
BOSNA I HERCEGOVINA
Federacija Bosne i Hercegovine
KANTON SARAJEVO
GRAD SARAJEVO
GRADONAČELNIK



Grad Sarajevo
City of Sarajevo

BOSNIA AND HERZEGOVINA
Federation of Bosnia and Herzegovina
CANTON OF SARAJEVO
CITY OF SARAJEVO
MAYOR

IZVJEŠTAJ
O AKTIVNOSTIMA GRADA SARAJEVA
U OBLASTI MEĐUNARODNE SARADNJE U 2017. GODINI

Predlagač: Gradonačelnik
Obradivač: Gradska služba za lokalnu
samoupravu i razvoj grada

Sarajevo, februar 2018. godine

Adresa: Hamdije Kreševljakovića 3, 71000 Sarajevo, Bosna i Hercegovina
Tel: +387 33 208 340, +387 33 443 050; **Fax:** +387 33 208 341
e-mail: grad@sarajevo.ba; **web:** www.sarajevo.ba



EYOF 2019
Sarajevo & East Sarajevo

SADRŽAJ

- I. UVOD***
- II. MEĐUNARODNI SKUPOVI***
- III. MEĐUNARODNA SARADNJA NA NIVOU GRADOVA***
- IV. SARADNJA S DIPLOMATSKO-KONZULARNIM PREDSTAVNIŠTVIMA***
- V. OSTALE AKTIVNOSTI NA PLANU MEĐUNARODNE SARADNJE***
- VI. INFORMACIJA O AKTIVNOSTIMA GRADA SARAJEVA U OKVIRU MEĐUNARODNIH ASOCIJACIJA ČIJI JE ČLAN***

I. UVOD

Programom rada Gradskog vijeća Grada Sarajeva za 2018. godinu predviđen je Izvještaj o aktivnostima Grada Sarajeva u oblasti međunarodne saradnje u 2017. godini koji se podnosi u februaru 2018. godine.

U izvještajnom periodu međunarodna saradnja Grada Sarajeva bila je značajno intenzivirana i usmjerena ka održavanju i unaprjeđenju postojeće saradnje s određenim gradovima, asocijacijama ili institucijama, te uspostavljanju saradnje s novim inostranim partnerima.

Godinu 2017. obilježili su susreti sa papom Franjom u Vatikanu, te gradonačelnicima i predstavnicima Ankare, Beča, Beograda, Budimpešte, Istanbula, Ljubljane, Magdeburga, Moskve, Prata, Pekinga, Podgorice, Pule, Skoplja, Zagreba i mnogih drugih gradova. Ostvareni su i brojni kontakti s predstavnicima diplomatsko-konzularnih predstavništava u Bosni i Hercegovini i izvan nje, te istaknutim ličnostima međunarodnog, političkog, kulturnog i javnog života.

Fokusirajući se na razvojnu komponentu, Grad Sarajevo je značajno doprinio afirmaciji glavnog grada Bosne i Hercegovine kao političkog, privrednog, kulturnog, sportskog i turističkog centra regije i Europe uopće.

Što se tiče saradnje na projektima s inostranim partnerima, Grad Sarajevo u partnerstvu s Gradom Rimom provodi projekat „RoSaE – Rim i Sarajevo za Europu“.

Također, Grad Sarajevo kao vodeći aplikant, zajedno sa Zavodom za zaštitu spomenika kulture Kraljevo i Kulturnim centrom "Vuk Karadžić" iz Loznice kao koaplikantima, kandidirao je projektnu ideju "Muzejska priča" za finansiranje iz IPA programa prekogranične saradnje Srbija i BiH.

Odluke usvojene na sjednicama Gradskog vijeća Grada Sarajeva tokom 2017. godine su sljedeće:

- Odluka o uspostavljanju saradnje između Grada Sarajeva i Engagement Global gGmbH/Servisne službe za jedinice lokalne samouprave jednoga svijeta, usvojena na sjednici održanoj 13.03.2017. godine;
- Odluka o uspostavljanju saradnje između Grada Sarajeva i Grada Sofije, usvojena na sjednici održanoj 26.07.2017. godine;
- Odluka o uspostavljanju saradnje između Grada Sarajeva i Prefektуре Centralnog administrativnog okruga Grada Moskve, usvojena na sjednici održanoj 27.09.2017. godine;
- Odluka o uspostavljanju saradnje između Grada Sarajeva i Grada Zurich-a i ETH Zurich i Matice BiH, usvojena na sjednici održanoj 27.09.2017. godine;

Grad Sarajevo je uz saglasnost Gradskog vijeća Grada Sarajeva potpisao sljedeće akte s predstavnicima jedinica lokalne samouprave drugih država, i to kako slijedi:

- Protokol o saradnji između Grada Sarajeva i Centralnog administrativnog okruga Grada Moskva, Sarajevo, 28.10.2017. godine;
- Memorandum o saradnji između Grada Sarajeva i Grada Beograda, Beograd, 10.11.2017. godine;

- Sporazum o međusobnoj saradnji između Grada Beograda, Grada Sarajeva, Grada Istočno Sarajevo i EYOF 2019 d.o.o. za realizaciju aktivnosti održavanja Zimskog europskog olimpijskog omladinskog festivala 2019, Beograd, 10.11.2017. godine;
- Sporazum o bratimljenju između Grada Skoplja i Grada Sarajeva, Skoplje, 14.11.2017. godine.

II. MEĐUNARODNI SKUPOVI

Svjetsko skijaško prvenstvo FIS Snow Queen Trophy Zagreb – Sljeme, 02. - 06.01.2017.

Na poziv gradonačelnika Zagreba, gradonačelnik Sarajeva Ivo Komšić, sekretar Gradske uprave Elvir Hadžiahmetović, i direktor EYOF-a 2019 d.o.o. Senahid Godinjak, prisustvovali su Svjetskom skijaškom prvenstvu FIS Snow Queen Trophy Zagreb - Sljeme, održanom od 03. do 05.01.2017. godine.

U kontekstu pripreme za EYOF 2019, organizatori su upoznali delegaciju Grada Sarajeva sa shemom organizacije FIS Svjetskog kupa.

„Partnerstvo održivog razvoja jedinica lokalne samouprave“, Gelsenkirchen (SR Njemačka), 15. - 18.01.2017.

U organizaciji Saveznog ministarstva za privrednu saradnju i razvoj SR Njemačke, Engagement Globala/Servisne službe za jedinice lokalne samouprave jednoga svijeta (SKEW) i Grada Gelsenkirchena, održana je Međunarodna početna radionica pilotne faze projekta *Partnerstvo održivog razvoja jedinica lokalne samouprave*, u Gelsenkirchenu (SR Njemačka) 16. do 17.01.2017. godine.

Događaj je okupio predstavnike njemačkih gradova/općina i partnerskih jedinica lokalne samouprave iz BiH (Sarajevo, Travnik, Zenica, Bijeljina, Goražde); Srbije (Kragujevac, Valjevo, Subotica, Zemun, Ruma); Kosova (Viti, Smira, Muštišt).

U ime Grada Sarajeva događaju su prisustvovala predstavnice Odjeljenja za međunarodnu saradnju i EU integracije, Merima Hadžiabdić i Zinaida Čengiđ, te Tanja De Santis i Nora Muehling iz pobratimskog Grada Wolfsburga.

Tokom Radionice, partnerski gradovi razgovarali su o 17 ključnih ciljeva održivog razvoja na lokalnom nivou koje UN proglasio najvećim problemima današnjice, a koji su navedeni u Agendi 2030 - završnom dokumentu Samita UN-a iz 2015. godine.

Predstavnicima svih jedinica lokalne samouprave uručen je *Memorandum o razumijevanju* koji je osnova za učešće u projektu *Partnerstvo održivog razvoja jedinica lokalne samouprave*.

Nakon što je Gradsko vijeće Grada Sarajeva donijelo Odluku o uspostavljanju saradnje između Grada Sarajeva i Engagement Globala/Servisne službe za jedinice lokalne samouprave jednoga svijeta, na sjednici održanoj 13.03.2017. godine, gradonačelnik Sarajeva je potpisao *Memorandum o razumijevanju*.

13. Europski omladinski olimpijski festival - EYOF 2017, Erzurum 11. - 18.02.2017.

13. Europski olimpijski festival mladih EYOF 2017 održan je u Erzurumu (Republika Turska) od 11. do 18.02.2017. godine.

Grad Erzurum je u dva navrata iskazao prijateljski odnos gradovima Sarajevo i Istočno Sarajevo, i to prvi put kada je odustao od kandidature za EYOF 2017. u korist Sarajeva i drugi put kada je pokazao razumijevanje i preuzeo organizaciju EYOF-a 2017. kako bi Sarajevo i Istočno Sarajevo imali dovoljno vremena za organizacione pripreme za EYOF 2019.

Bosnu i Hercegovinu predstavljalo je šest reprezentativaca na ovom takmičenju, a u Erzurumu su boravili i predstavnici EYOF-a 2019 d.o.o. koji su pratili organizacione pripreme turskih domaćina radi potrebnih iskustava za 14. EYOF koji će se održati u Sarajevu i Istočnom Sarajevu 2019.

Po završetku takmičenja, gradonačelnici Sarajeva i Istočnog Sarajeva, Abdulah Skaka i Nenad Samardžija, kao domaćini narednog EYOF-a preuzeli su olimpijsku zastavu.

Tokom boravka u Erzurumu, gradonačelnik Skaka susreo se s gradonačelnikom Erzuruma Mehmetom Sekmenom koji je ponudio stručnu pomoć u organizaciji EYOF-a 2019., a kao čin prijateljstva najavljena je mogućnost da Grad Erzurum restaurira fasade u jednoj od ulica Sarajeva.

Gradonačelnika Sarajeva primio je i guverner Erzuruma Seyffetin Azizoğlu, koji je ponudio podršku organizaciji EYOF-a 2019 u ljudskim resursima.

Direktor policije Erzuruma Mehmet Aslan izrazio je spremnost da policijski eksperti prenesu iskustva svojim kolegama u Sarajevu.

Sastanak gradonačelnika “Održiva urbana mobilnost u gradovima Jugoistočne Europe”, Berlin (SR Njemačka), 24. - 26.04.2017.

Zamjenik gradonačelnika Milan Trivić i stručna saradnica za kabinetske poslove Nejra Selimović, prisustvovali su sastanku na temu „Održiva urbana mobilnost u zemljama Jugoistočne Europe“ koji je u organizaciji Otvorenog regionalnog fonda za energetske efikasnost za Jugoistočnu Europu – GIZ, održan u Berlinu 24. do 26.04.2017. godine.

Učesnici su imali priliku posjetiti Savezno ministarstvo prometa i digitalne infrastrukture Njemačke, zatim Berlinsko prometno poduzeće, gdje su prisustvovali predavanju voditelja mrežnog planiranja i voditelja Sektorskog fonda GIZ ORF-EE, te su sudjelovali na radionici na temu unaprjeđenja transportnog sektora i prezentaciji GIZ aktivnosti u projektima u transportnom sektoru.

Gradonačelnici Skoplja i Prištine, te zamjenici gradonačelnika Sarajeva, Podgorice i Tirane, potpisali su Pismo namjere u vezi projekta *Održiva urbana mobilnost u gradovima Jugoistočne Europe*, s ciljem da uprave ovih gradova ponude projekte za energetske efikasne, čiste i održive gradske prevoze.

Prvi Samit gradonačelnika islamskog svijeta, Mashhad (IR Iran), 25. - 27.04.2017.

Na poziv gradonačelnika Mashhada, gradonačelnik Sarajeva Abdulah Skaka prisustvovao je Prvom Samitu gradonačelnika islamskog svijeta, održanom 25. do 27.04.2017. godine.

U radu Samita učestvovalo je oko 40 gradonačelnika i delegata iz 25 zemalja iz islamskog svijeta, znatan broj lokalnih, regionalnih, nacionalnih, kreatora politika i akademija.

Razgovarano je o različitim izazovima u vezi islamskog urbanog upravljanja i doprinosa konstruktivnim idejama koje bi se rješavale na visokorangiranim panelima.

Učesnici su objavili konačnu zajedničku deklaraciju o problemima islamskih zajednica i građana.

Pored gradonačelnika, u ime Grada Sarajeva Samitu su prisustvovala i savjetnica gradonačelnika Erna Čolić, i pomoćnica gradonačelnika za obrazovanje, kulturu i sport Amina Deljković.

Sajam - World Cities EXPO Istanbul 2017, Istanbul (R Turska), 18.05.2017.

Sajam World Cities EXPO Istanbul 2017, koji je u organizaciji Grada Istanbula održan 15. do 18.05.2017. godine, svečano su otvorili gradonačelnici Sarajeva i Istanbula, Abdulah Skaka i Kadir Topbaş.

Sajam u Istanbulu okupio je vodeće institucije, organizacije i stručnjake u oblasti energetske efikasnosti, a u cilju primjene dostignuća pametnih gradova u budućnosti. U okviru Sajma održane su različite sjednice i panel diskusije o budućnosti inteligentnog urbanizma, a razgovaralo se o različitim temama kao što su tehnologija i inovacije, okoliš i zdravi život, pametna vozila, energija, urbana transformacija, velika analiza podataka, Cyber Security i Smart City Strategies, koji čine koncept pametnog gradskog planiranja.

Pored gradonačelnika, u ime Grada Sarajeva Sajmu su prisustvovala savjetnica gradonačelnika Erna Čolić, pomoćnica gradonačelnika za obrazovanje, kulturu i sport Amina Deljković i Azra Kurtagić Smajić.

Prijem dobrodošlice za učesnike Sarajevo Business Foruma (SBF), Sarajevo, 21.05.2017.

Gradonačelnik Sarajeva Abdulah Skaka i direktor Bosna Bank International (BBI) Amer Bukvić upriličili su prijem dobrodošlice i poželjeli uspješan rad učesnicima 8. međunarodnog Sarajevo Business Foruma (SBF), koji je pod pokroviteljstvom Predsjedništva BiH održan u Sarajevu 22. i 23.05.2017. godine.

Sarajevo Business Forum jedan je od najvažnijih poslovnih i investicijskih događaja za Jugoistočnu Europu. Tradicionalno ga organizira BBI u saradnji s Islamskom razvojnom bankom. Ova međunarodna konferencija postala je globalna platforma za promociju projekata i privrednih subjekata, analizu i pripremu projekata, te adekvatnu prezentaciju privrednih potencijala, kao i uvezivanje privrednika i investitora na individualnom i institucionalnom nivou.

Gradonačelnik Skaka i direktor Bukvić podijelili su zahvalnice i plakete pojedincima zaslužnim za doprinos organizaciji Sarajevo Business Foruma.

Akademija za kulturni menadžment (CMA), Sofija, 11. - 13.07.2017.

Na poziv Goethe Instituta, zamjenik gradonačelnika Sarajeva Milan Trivić prisustvovao je Akademiji za kulturni menadžment (CMA), u Sofiji 11. do 13.07.2017. godine. Pored Sarajeva, u radu Akademije učestvovali su predstavnici Soluna, Bukurešta i Sofije.

Zamjenik gradonačelnika Trivić u Sofiji je ostvario kontakt s direktorom Mreže global EUNIC Andrew Murryem, i šefom Odjela za kulturu i medije francuskog Ministarstva za Europu i inostrane odnose Augustinom Favereauom, koji su podržali uključivanje Sarajeva u CMA i obećali ličnu poršku u realizaciji projekta Ars Aevi kao regionalnog i europskog projekta.

Kineski investicijski forum (CIF) 2017, Prag, 17. - 19.07.2017.

Češko-kineska komora za saradnju i Kineski centar za ekonomsku saradnju uputili su poziv Gradu Sarajevu na Kineski investicijski forum (CIF) 2017, koji je održan u Pragu od 17. do 19.07.2017. godine.

U ime Grada Sarajeva CIF-u 2017 prisustvovali su gradonačelnik Sarajeva Abdulah Skaka, i šefica za međunarodnu saradnju i europske integracije Merima Hadžiabdić.

Kineski investicijski forum mjesto je gdje se političari, privrednici i investitori iz Češke Republike, NR Kine i zemalja Srednje i Istočne Europe (CEE) susreću i dogovaraju saradnju između Kine i zemalja Srednje i Istočne Europe.

Gradonačelnik Sarajeva susreo se s ministrom vanjskih poslova Češke Republike Lubomirom Zaoralekom, te brojnim predstavnicima zemalja Srednje i Istočne Europe.

Predstavnici Grada Sarajeva učestvovali su i na panel diskusijama koje su se održavale u okviru CIF 2017.

Konferencija „Glavni gradovi kao generatori procesa razvoja“, Sarajevo, 11.08.2017.

Konferencija *Glavni gradovi kao generatori procesa razvoja* održana je u organizaciji Grada Sarajeva, 11.08.2017. godine.

Cilj Konferencije bio je pokretanje procesa jačanja saradnje i koordinacije glavnih gradova koji igraju sve važniju ulogu u razvoju država, kako u regiji tako i u cijeloj Europi.

Gradonačelnik Sarajeva bio je domaćin gradonačelnicima i predstavnicima glavnih gradova Podgorice, Zagreba, Beograda, Tirane i Istanbula, koji su učestvovali u radu Konferencije. Konferencija je okončana potpisivanjem Zajedničke izjave.

Forum „Hiljadu gradova, milioni građana: vizija za našu budućnost“, Venecija, 03. - 04.09.2017.

Zamjenik gradonačelnika Sarajeva Milan Trivić sudjelovao je u radu Međunarodnog foruma „Hiljadu gradova, milioni građana: vizija za našu budućnost“, održanom u Veneciji 03. i 04.09.2017. godine.

Na ovom Forumu razmatrane su najbolje prakse u okviru tema: javni gradski prijevoz, gradske sigurnosne mjere i upravljanje čvrstim otpadom u gradu.

28. Generalna skupština Međunarodne asocijacije “Gradovi glasnici mira” (IAPMC), Orestida (Republika Grčka), 06. - 10.09.2017.

Redovna sjednica Izvršnog odbora i 28. Generalna skupština Međunarodne asocijacije “Gradovi glasnici mira” (IAPMC), održana je u Orestidi (Republika Grčka) 06. do 10.09.2017. godine.

Sjednici je prisustvovalo osam delegacija gradova iz šest zemalja svijeta, a u ime Grada Sarajeva učestvovala je šefica Odjeljenja za stručne poslove u Službi Gradskog vijeća Mirjana Đanović Stanić.

Na Skupštini je, pored ostalog, prezentiran i jednoglasno prihvaćen prijem Grada Rostocka u članstvo IAPMC; usvojen Izvještaj generalnog sekretara IAPMC s elementima razmatranim na sjednici Izvršnog odbora; usvojen izvještaj predsjednika IAPMC s naglaskom da je Asocijacija sudjelovala u radu Generalne skupštine UN-a kada je usvojen tekst sporazuma o nuklearnom razoružanju.

Od budućih aktivnosti IAPMC izdvojena je kandidatura Asocijacije za članstvo u Izvršnom odboru Svjetske federacije UN udruženja koja je prošle godine obilježila 70 godina postojanja i čija je IAPMC članica od osnivanja.

Domaćinstvo za sjednicu Izvršnog odbora IAPMC u 2018. godini kandidirao je Abiđan (Obala Slonovače), a za 29. sjednicu Generalne skupštine IAPMC Volgograd (Ruska Federacija). Jubilara 30. Skupština Asocijacije bi se trebala održati u Sarajevu 2019. godine.

Na Skupštini je prezentiran i nacrt IAPMC *Orestida izjave*, koji je prihvaćen i koji će biti distribuiran gradovima na potvrđivanje.

Drugi forum gradonačelnika glavnih gradova država Centralne i Istočne Europe i Kine (16+1), Podgorica, 15.09.2017.

Drugom forumu gradonačelnika glavnih gradova zemalja Centralne i Istočne Europe i NR Kine 16+1, održanom u Podgorici 15.09.2017. godine prisustvovali su gradonačelnik Sarajeva Abdulah Skaka i savjetnik gradonačelnika za međunarodnu saradnju i EU integracije Ensar Eminović.

Gradonačelnik Skaka imao je izlaganje na temu *Uloga lokalnih samouprava u kreiranju poslovnog ambijenta*, a tokom Forumu susreo se s gradonačelnicima Pekinga, Beograda i Budimpešte.

Susret s gradonačelnikom Pekinga:

Prilikom susreta s gradonačelnikom Pekinga Chen Jiningom dogovoren je niz aktivnosti na uspostavljanju snažnijih ekonomskih veza i boljem povezivanju glavnih gradova BiH i Kine, a naročito jačanje saradnje u oblasti turizma. Gradonačelnik Pekinga prihvatio je poziv da dođe u zvaničnu posjetu Sarajevu, istakavši da je u turističkom smislu Sarajevo izuzetno zanimljivo za građane Pekinga, te je pozvao gradonačelnika Sarajeva s delegacijom zvaničnika, predstavnika turističke zajednice i novinara koja će posjetiti Peking i napraviti turističku promociju Sarajeva. Također, gradonačelniku Pekinga je ponuđeno da i glavni grad Kine na isti način predstavi svoju ponudu u Sarajevu.

Susret s gradonačelnikom Beograda:

Prilikom susreta s gradonačelnikom Beograda Sinišom Malijem, razgovarano je o jačanju saradnje glavnih gradova, te o pripremi zajedničkih projekata. Gradonačelnici su usaglasili uspostavu redovne komunikacije, te intenziviranje kontakata dvije gradske uprave. Dogovoreno je da se razmotri mogućnost zajedničkog nastupa Sarajeva i Beograda na trećim tržištima, te pri aktiviranju europskih fondova. Gradonačelnici Skaka i Mali dogovorili su posjetu delegacije Grada Sarajeva Gradu Beogradu u drugoj polovini oktobra 2017. godine.

Susret s gradonačelnikom Budimpešte:

Prilikom susreta s gradonačelnikom pobratimskog grada Budimpešta Istvánom Tarlósom, razgovarano je o potrebi konkretizovanja međusobnih veza. Gradonačelnik Skaka pozvao je svog kolegu iz Budimpešte da posjeti Sarajevo u okviru obilježavanja 6. aprila – Dana grada, te predložio da Filharmonija Grada Budimpešte održi koncert 9. maja, na Dan Europe i Dan pobjede nad fašizmom u sarajevskoj Vijećnici, kako bi se i na taj način kultura Budimpešte i Mađarske predstavila Sarajevu i Bosni i Hercegovini.

6. Dunavski biznis forum, Novi Sad, 04. - 06.10.2017.

6. Dunavskom biznis forumu, koji je pod pokroviteljstvom Privredne komore Srbije i Privredne komore Vojvodine održan u Novom Sadu 05. i 06.10.2017. godine, prisustvovao je zamjenik gradonačelnika Sarajeva Milan Trivić.

Cilj Foruma bila je promocija Dunavske strategije i uticaja biznisa na njenu implementaciju, a bilo je riječi o ulozi mladih poduzetnika i inovativnih žena u razvoju regiona, kao i o regionalnoj saradnji u službi razvoja i jačanja prosperiteta, investicijama u funkciji održivog razvoja, privrednim komorama kao servisima moderne ekonomske diplomatije, aktuelnim problemima sela i poljoprivrede i mogućnostima njihovog prevazilaženja.

Organizatori Dunavskog biznis foruma bili su Media Invent i Institut europskih regiona iz Salzburga, a pokrovitelj Privredna komora Srbije. U radu Foruma sudjelovali su predstavnici iz 14 zemalja Podunavlja.

Beogradski investicioni dani 2017.

Potpisivanje Memoranduma/Sporazuma o saradnji između Sarajeva i Beograda, Beograd, 09. - 10.11.2017.

Na poziv gradonačelnika Beograda Siniše Malija, delegacija Grada Sarajeva predvođena gradonačelnikom Abdulahom Skakom, prisustvovala je *Beogradskim investicionim danima*, održanim u Beogradu 09. i 10.11.2017. godine.

Tokom Gala večeri dobrodošlice, grad Sarajevo, kao i ostali glavni gradovi zemalja regiona, predstavljen je kratkim filmom, a u okviru *Panela gradonačelnika iz regiona*, predstavljeni su investicioni potencijali i najznačajniji projekti Grada Sarajeva.

Na temelju saradnje glavnih gradova BiH i Srbije, 10. novembra je potpisani su sporazumi između institucija iz oblasti kulture, turizma i nauke, što je rezultat razgovora koji su gradonačelnici Beograda i Sarajeva Siniša Mali i Abdulah Skaka, imali prilikom posjete delegacije Grada Sarajeva Gradu Beogradu 29. i 30.10.2017. godine.

Sporazum o saradnji između Beogradske i Sarajevske filharmonije potpisali su Asja Radonjić, urednica programa i v.d. direktora Sarajevske filharmonije Samir Lokvančić.

U ime Narodnog pozorišta u Beogradu i Narodnog pozorišta u Sarajevu sporazum su potpisali upravnik Dejan Savić i direktorica Marijela Hašimbegović, a u ime Turističke organizacije Beograda i Turističke zajednice Kantona Sarajevo v.d. direktora Miodrag Popović i predsjednik Nermin Muzur.

Sporazum je potpisan i između Naučno-tehnološkog parka Beograd i „Networks Int” d.o.o., a potpise su stavili v.d. direktorica Gordana Danilović-Grković i direktorica Bojana Škrobić-Omerović.

Potpisan je i Sporazum o međusobnoj saradnji između Grada Beograda, Grada Sarajeva, Grada Istočno Sarajevo i EYOF 2019 d.o.o. za realizaciju aktivnosti održavanja Zimskog europskog olimpijskog omladinskog festivala 2019., čiji su domaćini Sarajevo i Istočno Sarajevo, a potpisali su ga gradonačelnici Siniša Mali, Abdulah Skaka, Nenad Vuković, te direktor EYOF 2019. Senahid Godinjak.

Osim toga, gradonačelnici Beograda i Sarajeva Siniša Mali i Abdulah Skaka potpisali su i okvirni “Memorandum o saradnji” između glavnih gradova kojim je, između ostalog, predviđeno da će se Beograd i Sarajevo zalagati za dalje jačanje prijateljstva, pri čemu će unaprijediti saradnju od obostrane koristi na svim područjima koja su od interesa za građane dva grada.

Gradonačelnik Sarajeva izrazio je zadovoljstvo potpisivanjem sporazuma i memoranduma s nadom da će oni biti temelj za izgradnju kvalitetnih odnosa u budućnosti. On je naglasio da glavni gradovi u današnje vrijeme predstavljaju ključne karike u razvoju država i regija zbog čega je neophodna brža, lakša, efikasnija i sadržajnija komunikacija među njima.

Gradonačelnik Beograda rekao je da glavni gradovi, Sarajevo i Beograd, treba da budu pokretači i lokomotive daljeg razvoja i odnosa dvije zemlje, te izrazio želju da Sarajevo i Beograd budu faktori stabilnosti i mira u regionu i da zajedno kreiraju novu budućnost.

Međunarodni festival mira - Brescia 2017 (Republika Italija), 22. - 24.11.2017.

Na poziv Grada Brescia - Breša (Republika Italija), u ime gradonačelnika Sarajeva predstavnici Službe za obrazovanje, kulturu, sport i mlade, Elvir Nišić i Faruk Čatal, predstavljali su Grad Sarajevo na "Festivalu mira", međunarodnom događaju posvećenom miru, dijalogu i toleranciji u svijetu.

Delegacija se susrela s gradonačelnikom Breše Emiliom Del Bonom, kojem je prenijela pozdrave i poruke mira u ime gradonačelnika i građana Sarajeva.

U okviru programa "Festivala mira", predstavnici Betlehema (Palestina), Darmstadta (Njemačka), Bujumbura (Burundi), Assisija (Italija), Europskog vijeća iz Strasburga i Grada Sarajeva imali su svoja izlaganja, pri čemu treba istaći da je obraćanje, koje je Faruk Čatal imao u ime gradonačelnika Grada Sarajeva, bilo izuzetno zapaženo.

U razgovoru s ostalim učesnicima, predstavnici Grada Sarajeva ukratko su predstavili kulturni, sportski i festivalski program Grada Sarajeva, te izrazili spremnost za saradnju na projektima koji za cilj imaju promociju i jačanje dijaloga i mira, što su njihovi sagovornici i prihvatili.

Učešće delegacije Grada Sarajeva, ocijenjeno je kao vrlo afirmativno i značajno s aspekta grada koji je u svojoj novijoj historiji, imao jedinstveno iskustvo u ratu i opsadi s jedne, i očuvanju tradicije suživota i vjere u dijalog i mir, s druge strane. Još jednom su potvrđene simpatije i uvažavanje koje Sarajevo upravo zbog takvog iskustva i imidža, uživa u svijetu i postaje prepoznatljivim simbolom borbe za multikulturalnost i mir.

U narednom periodu se otvaraju mogućnosti za uspostavljanje kontakta i saradnje u oblasti obrazovanja, kulture, sporta i razmjene mladih, a u tom pogledu poseban interes su pokazali gradonačelnik i dogradonačelnica Grada Breše (u projektima kulturne razmjene mladih), vijećnik Općine Bethlehem (u projektima folklor, kulture i sporta), te predstavnici gradova Darmstadt (u oblasti projekata za mlade) i Assisi (u projektima muzičke kulture).

Regionalni projekat "Održiva urbana mobilnost u zemljama Jugoistočne Europe", Skoplje, 11.-14.12.2017.

Otvoreni regionalni fond za Jugoistočnu Europu - Energetska efikasnost (GIZ ORF-EE) pokrenuo je novi regionalni projekat pod nazivom "Održiva urbana mobilnost u zemljama Jugoistočne Europe - gradovi Jugoistočne Europe zajedno za održiv i energetska efikasan transport (SUMSEEC)".

S tim u vezi, GIZ ORF-EE organizirao je konferencija u Skoplju 12. i 13.12.2017. godine, kojoj su u ime Grada Sarajeva prisustvovali zamjenik gradonačelnika Milan Trivić i stručna saradnica Nejra Selimović.

Ovaj događaj označio je početak implementacije sporazuma koji je potpisan u Berlinu u aprilu 2017. godine između glavnih gradova Jugoistočne Europe: Sarajeva, Podgorice, Skoplja, Tirane i Prištine, kada su predstavnici gradova iskazali svoju posvećenost za udruživanje snaga s ciljem unaprijeđenja održive urbane mobilnosti u Jugoistočnoj Europi.

Cilj projekta je da kroz regionalne mreže poveže predstavnike političkog i civilnog sektora iz Jugoistočne Europe, koji su ključni za implementaciju bitnih rješenja u domenu energetske efikasnosti i održive urbane mobilnosti.

Fokus projekta je na pružanju direktne podrške zemljama JIE kroz jačanje kapaciteta gradova, kao i za ovu oblast značajnih aktera, s namjerom efektivne implementacije relevantnih EU regulativa u domenu energetske efikasnosti i zaštite od klimatskih promjena. Na duže staze, podrška ORF-EE-a će doprinijeti ublažavanju klimatskih promjena i urbane zagušenosti u zemljama JIE.

U okviru ovog događaja učesnici su razmijenili iskustva i prezentirali planirane aktivnosti gradova/institucija koje su zastupali.

Projekat će biti implementiran u toku naredne dvije godine.

III. MEĐUNARODNA SARADNJA NA NIVOU GRADOVA

Prijem bicikliste Dade Delića u Gradu Hirošimi, 25.01.2017.

Slijedom saradnje između Grada Hirošime i Grada Sarajeva, biciklista i istaknuti član PD „Željezničar“ Dado Delić, u okviru projekta „Biciklom kroz meridijane i paralele“, sufinansiranog od strane Grad Sarajeva, posjetio je Grad Hirošimu 25.01.2017. godine. Delića je u ime Grada Hirošime pozdravio zamjenik gradonačelnika Tetsuo Murota sa saradnicima. Nakon posjete Gradskoj vijećnici, obišao je Mirovni memorijalni park i Mirovni memorijalni muzej gdje se susreo s predsjedavajućim Fondacije za kulturu mira iz Hirošime Yasuyoshi Komizom.

Projektom putovanja Delić je želio skrenuti pažnju javnosti na problem globalnog zatopljanja, borbu za svijet bez granica, te promovirati biciklizam kao rekreaciju i ekološki prihvatljiv vid prijevoza.

Saradnja gradova Sarajevo i Rim u okviru projekta „Europa za građane“, 02.03.2017.

Na zahtjev Grada Rima, posredstvom Ambasade Republike Italije u BiH, Grad Sarajevo priključio se projektu u okviru programa “Europa za građane”. S tim u vezi, Grad Rim predao je 02.03.2017. godine aplikaciju za sredstva za zajednički projekat Rima i Sarajeva, povodom obilježavanja 60. godišnjice potpisivanja *Rimskih ugovora* 1957. godine.

Gradonačelnica Rima Virginia Raggi, dopisom od 18.09.2017. godine, obavijestila je Grad Sarajevo da je projektni prijedlog „*RoSaE – Rim i Sarajevo*“ odobren. Ovaj pozitivan rezultat predstavlja priliku da Rim i Sarajevo započnu bogatu saradnju uz učešće građana i civilnog društva.

Učešće građana u političkim odlukama i politikama koje utiču na njihove živote, posebno na lokalnom nivou, može se ojačati aktivnostima čiji je cilj potaknuti debatu o europskim vrijednostima.

Izrazila je uvjerenje da će projektne aktivnosti biti implementirane u duhu prijateljstva između dva grada kojima je dobro poznat značaj vrijednosti na kojima se temelji *Europa građana*. Učešće kvalificiranih partnera iz bosanskohercegovačkog i talijanskog akademskog svijeta predstavlja dodatnu vrijednost za projekt.

U okviru projekta „*RoSaE – Rim i Sarajevo za Europu*“ koji Grad Rim provodi u partnerstvu s Gradom Sarajevom, održan je radni sastanak u Gradu Rimu (Republika Italija), 05. do 06.12.2017. godine.

Radnom sastanku su u ime Grada Sarajeva prisustvovala Nermina Suljević, stručna savjetnica za poslove lokalne samouprave i Nina Fućec, stručna saradnica za međunarodnu saradnju.

Cilj projekta *RoSaE* je promoviranje mirnog suživota između ljudi unutar europske perspektive kroz povezivanje glavnog grada zemlje koja je jedan od osnivača Europske unije i zemlje koja ima status potencijalnog kandidata.

Projekt će podići svijest građana Rima i Sarajeva o važnosti četiri slobode koje su uvedene *Rimskim ugovorima* 1957., te njihovom doprinosu razvoju multikulture, demokratske i slobodne Europe u kojoj ljudi mogu mirno živjeti.

U kontekstu proslave šezdesete godišnjice potpisivanja *Ugovora* iz 1957. kojima je osnovana Europska ekonomska zajednica, dva grada će se podsjetiti osnivačkih principa i razmotriti revitalizaciju projekta europskih integracija kroz projektne aktivnosti koje će se sastojati od obuke za državne službenike i javne sesije otvorene za građane i NVO-e. Projektne aktivnosti će uključivati i dijeljenje audio-vizualnih materijala u sarajevskim školama i studijsku posjetu europskim institucijama u Briselu.

Predstavnica Grada Sarajeva Nermina Suljević predstavila je predviđene projektne aktivnosti Grada Sarajeva u narednom periodu i izrazila zadovoljstvo uspostavljanjem saradnje između dva grada koja će otvoriti mogućnosti za uspostavljanje kontakta i saradnje i u drugim oblastima od interesa za dva grada.

Posjeta delegacije Grada Istanbula, Sarajevo, 07. - 08.03.2017.

Gradonačelnik Sarajeva Abdulah Skaka primio je 08.03.2017. godine delegaciju Grada Istanbula, predvođenu savjetnikom gradonačelnika Istanbula Ismailom Hakkijem Turunçom. Razgovarano je o podršci Grada Istanbula Sarajevu u oblasti vodosnabdjevanja, odvoza i recikliranja otpada, te pomoći ljudima koji se nalaze u stanju socijalne potrebe.

Nakon prijema u Vijećnici, delegacija je u pratnji gradonačelnika Skake obišla Bijelu tabiju, obzirom da je gradska vlast Istanbula tokom posjete gradonačelnika Kadira Topbaşa Sarajevu u septembru 2016. godine iskazala spremnost da podrži obnovu ovog vrijednog kulturno-historijskog spomenika.

Predstavnici Grada Istanbula preuzeli su idejni projekat Bijele tabije, te predložili da tim eksperata iz Sarajeva posjeti Istanbul kako bi razradili akcioni plan za restauraciju ovog kompleksa.

Delegacija Istanbula obišla je i Medicinsku asocijaciju „BIMA“, te su tom prilikom obećali da će razmotriti mogućnost podrške za obnovu prostora ove Asocijacije, koja već 20 godina pruža besplatnu primarnu zdravstvenu zaštitu zdravstveno neosiguranom stanovništvu, uglavnom izbjeglicama – povratnicima u BiH. Predsjednik BIMA-e Faris Fočo istakao je da bi prostor koji je potrebno opremiti sadržavao tri polivalentne ambulante za djecu, žene i internističke preglede, te ambulatnu za operativne zahvate, laboratoriju i apoteku.

Večer hrvatskog folkora, Sarajevo, 10.03.2017.

U sklopu projekta *Hrvati izvan domovine*, održan je koncert *Večer hrvatskog folklor*a pod pokroviteljstvom Grada Sarajeva, Grada Zagreba, te Hrvatske matice iseljenika, u Domu mladih u Sarajevu 10.03.2017. godine. Koncert je održan po drugi put zaredom, a učestvovala su kulturno-umjetnička društva iz Zagreba „Prigorec“ i „Laz“, Hrvatsko kulturno umjetničko društvo „Rodoč“ iz Mostara, te sarajevsko KUD „Gajret“.

Zamjenik gradonačelnika Milan Trivić pozdravio je učesnike, te im poželio dobrodošlicu u glavni grad Bosne i Hercegovine.

Izaslanik gradonačelnika Zagreba Krešimir Kompesak istakao je da Grad Zagreb rado podržava ovakve kulturne manifestacije, te posebno naglasio odličnu saradnju koju hrvatski glavni grad ima s prijateljskim Gradom Sarajevom.

Posjeta gradonačelnika Sarajeva Gradu Ljubljani, 20. - 22.03.2017.

Na poziv gradonačelnika Ljubljane Zorana Jankovića, gradonačelnik Sarajeva Abdulah Skaka i savjetnica gradonačelnika Erna Čolić boravili su u službenoj posjeti Ljubljani od 20. do 22.03.2017. godine. Tom prilikom gradonačelnici Ljubljane i Sarajeva razgovarali su o unaprjeđenju odnosa između dva grada posebno u oblasti urbane infrastrukture.

Dogovorena je saradnja i razmjena iskustva u oblasti komunalnih servisa i javnog prevoza, a primjer Ljubljane kao dobre prakse koriste mnoge naprednije zemlje. Grad Ljubljana je spreman prenijeti svoja iskustva i u oblasti separacije otpada gdje odvojeno sakupljanje počinje već na kućnom pragu, čime se unaprjeđuje koncept zelene privrede, a Ljubljana je 2016. godine nosila epitet *zelene prijestonice Europe*.

Dogovorena je zajednička saradnja i u oblasti kulture, a posebno je zanimljiv način na koji je Ljubljana riješila pitanje obnove objekata od historijskog i kulturnog značaja, tako što je pored obnove data i nova savremena dimenzija. Grad Ljubljana stoji na raspolaganju u vezi pripreme projektne dokumentacije pri apliciranju na EU fondove, posebno u oblasti zaštite kulturne baštine.

Grad Ljubljana zainteresiran je za kreiranje zajedničkog prijedloga projekta i apliciranje na fondove prekogranične saradnje.

Dogovoreno je da Grad Sarajevo inicira jednodnevnu konferenciju na kojoj bi sudjelovali gradonačelnici glavnih gradova regiona i gradonačelnik Beča (Konferencija pod nazivom *Glavni gradovi kao generatori procesa razvoja*, održana je u Sarajevu 11.08.2017. godine).

Gradonačelnici Janković i Skaka otvorili su izložbu američke umjetnice bh. porijekla Edine Selesković, u Gradskoj vijećnici 21.03.2017. godine. Pred slovenskom publikom predstavljen je projekat Misli Sloboda koji je poslao poruku mira i slobode cijeloj Europi, Americi i svijetu. Ovaj projekat objedinjuje skulpturu, instalaciju, performans, svjetlo, zvuk, film, pisanu riječ, ali i nove globalne komunikacijske tehnologije kako bi spojio mlade generacije s univerzalnom snagom suvremene umjetnosti. Projekat je iniciran u Sarajevu 2015. godine, a sada putuje u 30 gradova svijeta povezujući mlade ljude i savremenu umjetnost, gradove i publiku.

Gradonačelnik Skaka susreo se i s muftijom ljubljanskim Nedžadom efendijom Grabusom s kojim je obišao gradilište Islamskog centra u sklopu kojeg će biti izgrađena prva džamija u Sloveniji.

Sastanak s direktorom Udruženja Herbtsalon e.V. iz Magdeburga, Sarajevo, 05.04.2017.

Predstavnica Odjeljenja za međunarodnu saradnju i europske integracije Zinaida Čengić, održala je sastanak s direktorom Udruženja Herbtsalon e.V. iz Magdeburga Lotharom Güntherom, i menadžericom za odnose s javnošću Udruženja Ursulom Günther.

Razgovarano je o namjeri Udruženja umjetnika „Herbstsalon e.V.“ da svoju godišnju izložbu posveti obilježavanju 40. godišnjice pobratimstva između Sarajeva i Magdeburga, na način da spoji umjetnike dva grada u jedan umjetnički dijalog u projektu pod nazivom *Prebroditi*. (Zajednička izložba slika iz Magdeburga i grafika iz Sarajeva postavljena je u Elbfoyer zgradi lokalne TV stanice MDR, u Magdeburgu, 22.09. do 04.11.2017. godine).

Günther se u Sarajevu sastao i sa akademskim grafičarem i predsjednikom Akademije likovnih umjetnosti Sarajevo Admirom Mujkićem, s kojim je dogovorio tehničke detalje održavanja izložbe u Magdeburgu.

S navedenim projektom Günther je upoznao i direktoricu Goethe Instituta u Sarajevu, a prilikom susreta s predstavnicima Odjeljenja za kulturu Ambasade SR Njemačke u BiH, razmatrana je mogućnost organizacija uvoza/izvoza grafika. Također, dogovoreno je da će Ambasada snositi troškove dvije do tri avionske karte za umjetnike iz BiH.

Posjete delegacija povodom 6. aprila – Dana grada Sarajeva, Sarajevo, 05. - 07.04.2017.

Delegacije prijateljskih i bratskih gradova Budimpešte, Dubrovnika, Novog Pazara, Prata, Pule, Zagreba, istanbulske Općine Fatih, boravile su u Sarajevu u povodu obilježavanja 6. aprila – Dana grada Sarajeva.

U okviru programa, delegacije su položile cvijeće na spomen obilježju Vječna vatra i Spomen obilježju ubijenoj djeci opkoljenog Sarajeva 1992. - 1995. godine, te su prisustvovala Svečanoj sjednici Gradskog vijeća Grada Sarajeva.

Posjeta delegacije Gradske općine Ljubljana, Sarajevo, 08.04.2017.

Zamjenik gradonačelnika Milan Trivić primio je delegaciju Gradske općine Ljubljana, predvođenu zamjenikom gradonačelnika Dejanom Crnekom, u Vijećnici 08.04.2017. godine. Prijemu je prisustvovala i ambasador Republike Slovenije u BiH Iztok Grmek. Svrha ovog studijskog putovanja bila je upoznavanje i razmjena iskustava između dva grada.

Prijem delegacije pokrajine Baden-Württemberg, Sarajevo, 13.04.2017.

Njemačka delegacija predvođena državnim tajnicom u državnom ministarstvu pokrajine Baden-Württemberg Theresom Schopper, posjetila je Dom zdravlja „Omer Maslić“, 13.04.2017. godine.

Pored predstavnika JU Dom zdravlja KS, Organizacione jedinice Novo Sarajevo i Općine Novo Sarajevo, u ime Gradskog vijeća Grada Sarajeva prijemu su prisustvovali predsjedavajući Komisije za međunarodnu saradnju Gradskog vijeća Hazim Bahtanović i član Komisije za međunarodnu saradnju Gradskog vijeća Srđan Srdić.

Povod posjete delegacije pokrajine Baden-Württemberg bilo je 45 godina dugo pobratimstvo između Sarajeva i Friedrichshafena, te povezanost s Domom zdravlja „Omer Maslić“, u čiju su obnovu i opremanje Uprava i građani Friedrichshafena uložili 800.000 EUR.

Direktorica organizacione jedinice Novo Sarajevo dr. Zumreta Bihorac-Kučuk podsjetila je na dugogodišnje prijateljstvo, te zahvalila na različitim vidovima podrške Grada i građana Friedrichshafena ovoj zdravstvenoj ustanovi i njenim korisnicima. Bihorac-Kučuk ukratko je upoznala delegaciju s procesom izrade projekta za ugradnju lifta u Domu zdravlja „Omer Maslić“, koji će finansirati Grad Friedrichshafen.

Državna tajnica Theresa Schopper prenijela je pozdrave i želje gradonačelnika Friedrichshafena Andreasa Branda da se uspješna saradnja između Sarajeva i Friedrichshafena nastavi i ojača. Izrazila je nadu da će donirana oprema i sredstva, kao i planirana donacija za ugradnju lifta, doprinijeti pružanju kvalitetne usluge bolesnicima.

Grad Sarajevo posreduje između pobratimskog Grada Friedrichshafena i Doma zdravlja Omer Maslić u vezi realizacije sredstava - donacije građana Friedrichshafena za potrebe ugradnje lifta u ovom Domu zdravlju. Nadležno Ministarstvo zdravstva Kantona Sarajevo, odnosno Dom zdravlja Omer Maslić, zadužen je za konkretne aktivnosti ugradnje lifta, koje su u toku.

Direktorica Doma zdravlja Omer Maslić obavijestila je Grad Sarajevo da je određena lokacija za ugradnju unutrašnjeg lifta, te da će Općina Novo Sarajevo finansirati izradu projektne dokumentacije u cilju pribavljanja urbanističke saglasnosti i građevinske dozvole za ugradnju lifta, kao i da je u toku prikupljanje dokumentacije potrebne za izradu projektne dokumentacije.

Prijem delegacije 12. Općine Grada Teherana, Sarajevo, 13.04.2017.

Gradonačelnik Sarajeva Abdulah Skaka i pomoćnica gradonačelnika Amina Deljković primili su delegaciju 12. Općine Grada Teherana, koja je u Sarajevu boravila povodom bratimljenja s Općinom Stari Grad.

Vođa delegacije, načelnik Abed Maleki, čestitao je gradonačelniku na izboru i zaželio uspjeh u obavljanju dužnosti, te prenio pozdrave i poziv gradonačelnika Teherana za posjetu. Sagovornici su se složili da između naroda BiH i IR Iran postoje mnoge kulturno-historijske veze i sličnosti, a da uspostavljanjem pobratimskih odnosa između Sarajeva i Teherana te veze postaju još jače.

Načelnik Maleki zahvalio je gradonačelniku Sarajeva i njegovim saradnicima na ustupanju Vijećnice za održavanje *Dana kulture Irana*, u periodu od 13. do 17.02.2017. godine, te izrazio nadu da će ova kulturna manifestacija prerasti u tradicionalan događaj.

Obilježavanje 20. aprila - Dana grada Novog Pazara, 20. – 21.04.2017.

Na poziv gradonačelnika Novog Pazara Nihata Biševca, delegacija Grada Sarajeva koju su činili gradonačelnik Abdulah Skaka, v.d. direktor Sarajevo d.o.o. Esad Tanović, te saradnici Denis Kovačević i Azra Kurtagić Smajić prisustvovali su obilježavanju Dana grada Novog Pazara - 556. godišnjice od osnivanja, u periodu od 20. do 21.04.2017. godine.

Prilikom bilateralnog susreta s gradonačelnikom Novog Pazara i njegovim saradnicima, razgovarano je o unapređenju odnosa dva grada na polju kulture i sporta.

Tokom boravka u Novom Pazaru, delegacija je posjetila i Bošnjачko nacionalno vijeće.

Obilježavanje 5. maja – Dana oslobođenja i Dana grada Pule, 05.05.2017.

Zamjenica predsjedavajućeg Gradskog vijeća Grada Sarajeva Edina Gabela i zamjenik gradonačelnika Grada Sarajeva Ivica Šarić prisustvovali su obilježavanju 5. maja – Dana oslobođenja i Dana grada Pule, i to Svečanoj sjednici Gradskog vijeća Grada Pule, te brojnim manifestacijama organiziranim u sklopu Programa obilježavanja Dana grada Pule.

Ovom gestom Grad Sarajevo je ukazao na izuzetno prijateljstvo dva grada pobratima i namjeru da Gradske uprave Sarajeva i Pule nastave uspješnu saradnju i razmjenu iskustava, pogotovo u oblasti kulture i turizma, obzirom da su gradovi filma i gradovi bogate kulturno-historijske baštinom.

Susret gradonačelnika Sarajeva i Ankare, Ankara (R Turska), 18.05.2017.

Na poziv gradonačelnika pobratimskog grada Ankara Meliha Gökçeka, gradonačelnik Sarajeva Abdulah Skaka boravio je u službenoj posjeti Gradu Ankari, u periodu od 17. do 18.05.2017. godine. Pored gradonačelnika, u ime Grada Sarajeva u službenoj posjeti Gradu Ankara bile su i savjetnica gradonačelnika Erna Čolić, pomoćnica gradonačelnika za obrazovanje, kulturu i sport Amina Deljković, i Azra Kurtagić Smajić.

Prilikom bilateralnog susreta, gradonačelnici su se složili da je saradnje između glavnih gradova dvije države potrebno više intenzivirati.

Gradonačelnik Skaka je naglasio da je za Grad Sarajevo veoma značajna razmjena znanja i iskustva u oblasti urbane infrastrukture i komunalnih usluga.

Prema riječima gradonačelnika Gökçeka, između dvije zemlje postoji veliko međusobno poštovanje i prijateljstvo, a posebno je važna saradnja Sarajeva i Ankare kako bi se to održalo i unaprijedilo.

Tokom ove posjete gradonačelnik Skaka sastao se i s direktorom TIKA-e za Balkan i Istočnu Europu Mahmutom Çevikom, te zahvalio za podršku koju TIKA pruža našoj zemlji već dugi niz godina. Tema sastanka bili su započeti projekti u Sarajevu i prioriteti u narednom periodu.

Svim zvaničnim sastancima u Ankari prisustvovao je ambasador BiH u Turskoj Bakir Sadović.

U okviru posjete Ankari, gradonačelnik Sarajeva susreo se i sa savjetnikom predsjednika R Turske Yalçınom Topcuom u Predsjedničkoj palati u Ankari. Održanje i unaprijeđenje dobrih odnosa između Turske i BiH bile su glavne teme sastanaka.

Gradonačelnik Skaka kazao je da BiH cijeni sve ono što je R Turska uradila u BiH, naglasivši da je partnerski odnos između dvije zemlje ono na čemu treba insistirati, posebno u oblasti privrede.

Susret gradonačelnika Sarajeva i Konya-e, Konya (R Turska), 19.05.2017.

Delegacija Grada Sarajeva koju su činili gradonačelnik Abdulah Skaka, savjetnica gradonačelnika Erna Čolić, pomoćnica gradonačelnika za obrazovanje, kulturu i sport Amina

Deljković i Azra Kurtagić Smajić boravili su u Konya-i u periodu od 18. do 19.05.2017. godine.

Gradonačelnik Skaka susreo se s gradonačelnikom prijateljskog Grada Konya Tahinom Akyurekom, te mu zahvalio za donaciju tramvaja koje je Grad Konya poklonio gradu Sarajevu.

Radna posjeta Gradu Cirihi, ETH Cirihi i Mini Ekonomskom Forumu Matice BiH, Cirihi (Švicarska Konfederacija), 07. - 08.06.2017.

Gradonačelnik Sarajeva Abdulah Skaka boravio je u službenoj posjeti Gradu Cirihi, gdje se sastao s gradonačelnicom Corine Mauch, s kojom je razgovarao o naučnoj razmjeni između dva grada u saradnji s ETH Cirihi i Maticom BiH. Gradonačelnica Mauch iskazala je spremnost za razmjenu iskustva i dobre prakse koju posjeduje Grad Cirihi i konkretiziranje saradnje dva grada u oblasti urbanog razvoja.

Potom je uslijedila posjeta rektoratu Švicarskog federalnog instituta za tehnologiju (ETH Cirihi), gdje je domaćin bila katedra Urban - Think Tank koja uspješno saraduje s Gradom Sarajevom od 2015. godine. Tokom ove posjete razgovarano je o modusima saradnje.

Gradonačelnik Skaka, u ulozi specijalnog gosta, i arhitekta Sead Gološ, sudjelovali su u radu 7. Mini Ekonomskog Forumu BiH „Urbani razvoj kao katalizator ekonomske, društvene i ekološke transformacije”, koji je u organizaciji Matice BiH i ovogodišnjeg tematskog partnera (ETH Cirihi i Katedre Urban - Think Tank „Reactivate Sarajevo“, održan u Cirihi od 07. do 08.06.2017. godine.

Učešće gradonačelnika Sarajeva na ovom događaju predstavljalo je nastavak uspješne saradnje s ETH Cirihi, Urban - Think Tankom „Reactivate Sarajevo“ i Maticom BiH koja je kulminirala u prvom predstavljanju BiH na Venecijanskom Bijenalu Arhitekture 2016.

Mini Ekonomski Forum okončan je potpisivanjem zajedničke izjave od strane Grada Sarajeva, Grada Ciriha, ETH Cirihi i Matice BiH, koji će u narednom periodu ojačati međusobnu saradnju u domenu urbanog razvoja s fokusom na projektnu saradnju u pronalaganju adekvatnog rješenja za integralnu transformaciju centralnog dijela Sarajeva u kvartu Marijin Dvor.

Ceremonija otkrivanja "Kamena za mir", Sarajevo, 21.06.2017.

Gradonačelnik Sarajeva Abdulah Skaka i predsjednik Asocijacije *Kamen za mir iz Hirošime*, Michio Umemoto, na svečanoj ceremoniji upriličenoj u Botaničkoj bašti Zemaljskog muzeja BiH, 21.06.2017. godine, otkrili su kamen mira koji je Gradu Sarajevu darovao Grad Hirošima.

Ovom prilikom gradonačelnik Skaka je izrazio zadovoljstvo što je Sarajevo postalo 111. grad Europe i svijeta koji je preuzeo ovaj kamen, čime se nastavlja promocija mirovne misije Asocijacije iz Hirošime koja traje već 26 godina.

Kamen iz Hirošime jedan je od 200 kamenih fragmenata izvađenih ispod tramvajskih šina kod Aioi mosta, koji se nalazio 200m sjeverno od mjesta gdje je eksplodirala atomska bomba, koja je bačena na ovaj japanski grad 06.08.1945. godine. U svaku ploču je uklesan lik japanske božice milosti Kannon i riječi *Iz Hirošime*, a bilo je potrebno 10.000,00 ljudi i sedam godina rada da bi se isklesali svi kameni blokovi.

Prema riječima predsjednika Asocijacije, ovaj kamen trebao bi da opominje na svu tragičnost ratnih razaranja kroz koja su prošla Sarajevo i Hirošima, ali i da ukazuju na potrebu stalne borbe za mir, harmoniju i međusobno uvažavanje. Iskazao je uvjerenje da će se spona između zemalja koje posjeduju ovaj kamen širiti i postajati čvršće.

Ambasador Japana u BiH Kazuya Ogawa podsjetio je na potpisanu Deklaraciju o razmjeni iskustava i saradnji između Sarajeva i Hirošime, kao i ulogu Grada Sarajeva u Asocijaciji *Gradonačelnici za mir*.

Svečana ceremonija u Zemaljskom muzeju završena je uručivanjem likovnih radova sarajevskih osnovaca prijateljima iz Hirošime, te nastupom naših Dječijeg hora „Palčići“ koji je otpjevao „Kamen mira svijetom maršira“ i „Zajedno smo ljepši, jači, bolji“.

Prijem delegacije Grada Konya, Vijećnica, 06.07.2017.

Gradonačelnik Sarajeva Abdulah Skaka upriličio je prijem za delegaciju Grada Konya, koju su predvodili gradonačelnik Tahir Akyürek i počasni konzul BiH u Konyi Ercan Uslu.

Ovom prilikom nastavljeni su dogovori o međusobnoj saradnji dva grada koji su u partnerskim i prijateljskim vezama još od 2007. godine.

Gradonačelnik Skaka zahvalio je Gradskoj upravi Konye na dosadašnjoj podršci Sarajevu, naročito u oblasti unaprjeđenje komunalne infrastrukture. S tim u vezi istaknuta je donacija Grada Konye od 20 tramvaja isporučenih preduzeću GRAS-u.

Posjeta predstavnika Grada Istanbula, Sarajevo, 07.07.2017.

Predstavnici Grada Istanbula, Serkan Balık (AĞAÇ A.Ş.) i Emin Batur (KIPTAŞ), boravili su u Sarajevu 07.07.2017. godine, u vezi studije restauracije džamije na lokalitetu Bijele tabije i Kuća Alije Đerzeleza koja je ustupljena Gradu Istanbulu.

Nakon obilaska lokaliteta Bijele tabije, predstavnike Grada Istanbula su primile pomoćnica gradonačelnika za urbano planiranje i stambene poslove Nedreta Komarica, i stručna savjetnica u Službi za urbano planiranje i stambene poslove Arijana Musić.

Nakon što im je prezentiran idejni projekat namjene i korištenja kompleksa Bijela tabija, predstavnici Grada Istanbula iskazali su zainteresiranost za izradu glavnog projekta, te predložili da se razmotri mogućnost da se džamija izgradi na prilaznom platou umjesto nekog od ugostiteljskih objekata koji su planirani u tom dijelu.

Posjeta gradonačelnika Bad Ischla, Vijećnica, 18.07.2017.

Zamjenici gradonačelnika Sarajeva Ivica Šarić i Milan Trivić upriličili su prijem za gradonačelnika Bad Ischla Hannesa Heidea i novinara Horsta Wilhelma Kupriana.

Predstavnici dva grada iskazali su spremnost za unaprjeđenjem međusobnih prijateljskih veza u skladu s potpisanim *Sporazumom o saradnji*, na svim područjima od interesa za njihove građane, prvenstveno u oblasti turizma, muzike, sporta, muzeja, festivala.

Posjeta gradonačelnika Istanbula, 24.08.2017.

U organizaciji dva pobratimska grada, Istanbula i Sarajeva, manifestacija “Dani kulture Istanbula u Sarajevu”, održana je od 24. do 27.08.2017. godine. Ovim povodom gradonačelnik Istanbula Kadir Topbaş boravio je u jednodnevnoj posjeti Sarajevu.

Performans “Barcelona, Sarajevo je s tobom”, Sarajevo, 25.08.2017.

Mladi umjetnici iz Sarajeva, na Trgu Barcelone (Mojmilo), započeli su 25.08.2017. godine izradu murala posvećenog pobratimskom gradu Barceloni povodom terorističkog napada od 17.08.2017. godine. Na muralu na kojem je istaknut gušter - zmaj Draco, jedan od simbola Barcelone, napisano je „Barcelona, Sarajevo esta contigo“ (Barcelona, Sarajevo je uz tebe).

Grad Sarajevo organizirao je multimedijalni performans s ciljem pružanja podrške gradu čiji su stanovnici bili uz građane glavnog grada za vrijeme agresije na BiH, te pružili značajnu podršku njegovoj obnovi.

Pored gradonačelnika Sarajeva, performansu su prisustvovali počasni predsjednik Kraljevskog teniskog kluba Barcelona 1899 i počasni građanin Grada Sarajeva Juan Mario Tintore, i ambasador Španije u BiH Juan Bosco Gimenez Soriano. Mural je završen 23.09.2017. godine.

Dan grada Pečuha, 01.09.2017.

Na poziv gradonačelnika prijateljskog mađarskog grada Pečuha Pavaa Zsolta, zamjenica Predsjedavajućeg Gradskog vijeća Mira Jurić i gradska vijećnica Sanela Fijuljanin prisustvovala su zajedničkoj Svečanoj sjednici Generalne skupštine Grada Pečuha, povodom obilježavanja Dana grada Pečuha - 1. septembra.

Tokom trodnevne posjete, delegacija Grada Sarajeva prisustvovala je, između ostalog, i obilježavanju 650. godišnjice Univerziteta u Pečuhu, te koncertu Panonskog filharmonijskog orkestra.

73. godišnjica oslobođenja grada Prata, Prato, 06. - 08.09.2017.

U povodu obilježavanja 73. godišnjice oslobođenja grada Prata (Republika Italija), predsjedavajući Gradskog vijeća Grada Sarajeva Igor Gavrić, zamjenik

gradonačelnika Ivica Šarić, zamjenica predsjedavajućeg Edina Gabela, gradski vijećnici Nuko Grebović, Miro Lazović i Srđan Srdić, te načelnik Općine Novo Sarajevo Nedžad Koldžo boravili su u službenoj posjeti gradu Pratu.

Predstavnici Grada Sarajeva sastali su se sa senatorom Republike Italije Claudiom Martinijem koji je za vrijeme agresije u BiH, kao gradonačelnik Grada Prata, te guverner Toscanne dao izuzetno značajan doprinos uspostavljanju pobratimskih odnosa između Grada Sarajeva i Grada Prata, kao i uspostavljanju formalne saradnje s regijom Toscana. Tome je prethodila značajna pomoć koju je ovaj grad pružio građanima Sarajeva tokom opsade 1992. - 1995. godine.

Prilikom susreta s predstavnicima Grada Sarajeva, senator Martini izrazio je spremnost da podrži realizaciju projekta Muzej savremene umjetnosti Ars Aevi. Ovom prilikom izražene su obostrane želje za nastavkom daljnje saradnje između pobratimskih gradova Sarajeva i Prata.

Predsjedavajući Gradskog vijeća Igor Gavrić je istakao da Grad Sarajevo s Gradom Pratom njeguje dugogodišnje iskreno prijateljstvo, koje je rezultiralo ostvarivanjem značajne saradnje za Grad Sarajevo, te da i ova posjeta ojačava sponu dva grada koja nastavljaju dalju saradnju na realizaciji zajedničkih projekata.

Delegacija Grada Sarajeva prisustvovala je i protokolarnim događajima iz programa obilježavanja 73. godišnjice oslobođenja grada Prata i tradicionalne manifestacije "Corteggio storico".

40. godišnjica pobratimstva Magdeburga i Sarajeva, Magdeburg, 02. - 04.10.2017.

Povodom obilježavanja 40. godišnjice pobratimskih odnosa između Grada Sarajeva i njemačkog Grada Magdeburga, na poziv gradonačelnika Magdeburga Lutza Trümpera, predsjedavajući Gradskog vijeća Igor Gavrić sa svojim zamjenicama Mirom Jurić i Edinom Gabelom, te gradskim vijećnicima Velijom Katicom i Bajrom Biberom boravili su u službenoj posjeti gradu Magdeburgu.

Gradonačelnik Magdeburga upriličio je prijem za delegaciju Grada Sarajeva tokom kojeg su razmijenjena mišljenja o dosadašnjoj dugogodišnjoj saradnji, te je razgovarano o intenziviranju buduće saradnje u oblasti ekonomije i turizma dva pobratimska grada.

Delegacija Grada Sarajeva sastala se i s dogradonačelnikom Rainerom Nitscheom, zaduženim za pitanja razvoja biznisa, turizma i regionalne saradnje, te predstavnicima GIZ-a. Tom prilikom, između ostalog, dogovorena je saradnja malih i srednjih preduzeća Grada Magdeburga i Grada Sarajeva koja bi se trebala upriličiti u aprilu sljedeće godine, na konferenciji kojoj će domaćin biti Grad Sarajevo. Razgovarano je i o saradnji u oblasti novih izvora energije i zaštite okoliša.

Također, upriličen je sastanak s predsjedavajućim Gradskog vijeća Grada Magdeburga Andreasom Schumannom i njegovim zamjenikom, tokom kojeg je delegacija Grada Sarajeva upoznata s djelokrugom Grada Magdeburga, te su razmijenjena iskustva u parlamentarnom radu.

Predstavnici Grada Sarajeva prisustvovali su brojnim protokolarnim događajima iz programa obilježavanja manifestacije. Predsjedavajući Gradskog vijeća Igor Gavrić, zajedno s

gradonačelnikom Magdeburga Trümperom, otvorio je 26. Festival Grada. Tom prilikom, predsjedavajući Gradskog vijeća Gavrić gradonačelniku i građanima Magdeburga čestitao je nacionalni praznik – Dan ujedinjenja Njemačke, te zahvalio gradu Magdeburgu na dugogodišnjem partnerstvu i nesebičnoj pomoći koju pruža građanima Sarajeva.

Delegacija Grada Sarajeva je posjetila izložbu Udruženja umjetnika Herbstsalon i umjetnika Akademije likovne umjetnosti Sarajevo „Über-Wunden“ posvećenu dugogodišnjem partnerstvu dva grada, na kojoj je, između ostalog, predstavljeno 12 sarajevskih umjetnika s 57 radova.

Nakon obilaska stare Gradske vijećnice, delegacija Grada Sarajeva je imala čast upisati se u “Zlatnu knjigu Grada Magdeburga”, u koju se upisuju počasni gosti Grada Magdeburga, među kojima je i Angela Merkel.

Studijska posjeta delegacije Grada Friedrichshafena, 29.09. - 04.10.2017.

Delegacija njemačkog pobratimskog Grada Friedrichshafena predvođena zamjenikom gradonačelnika Wolfgangom Siggom i predsjednikom Udruženja građana „Pro Sarajevo“ Berndom Fuchsom, boravila je u Sarajevu od 29.09. do 04.10.2017. godine.

Prilikom posjete *KJU Dom za djecu bez roditeljskog staranja*, Sigg i Fuchs uručili su direktoru Saudinu Đurđeviću donatorski ček u iznosu od 4.600 eura.

(Ovim sredstvima koja su obezbijedili članovi Udruženja „Pro Sarajevo“ finansirano je uvođenje centralnog grijanja u Kući za mlade – Blagovac u Vogošći, koja djeluje u sklopu navedenog Doma).

Pomoćnica gradonačelnika za obrazovanje, kulturu i sport Amina Deljković zahvalila je na ovoj značajnoj donaciji, te istaknula izuzetno prijateljstvo, poštovanje i solidarnost koji već 45 godina krase odnose ova dva grada i njihovih građana.

Delegaciju Friedrichshafena primio je zamjenik gradonačelnika Sarajeva Milan Trivić u Vijećnici 2. oktobra. Trivić je zahvalio Upravi, građanima i Udruženju „Pro Sarajevo“ ovog prijateljskog grada na pruženoj pomoći tokom rata, a posebno na donacijama nakon rata usmjerenim Domu zdravlja “Omer Maslić” i Dječijem domu „Bjelave“.

Sagovornici su se složili da će gradske uprave Sarajeva i Friedrichshafena i ubuduće nastaviti izuzetno sadržajnu i kvalitetnu saradnju koju su do sada činile brojne aktivnosti i uzajamne posjete u koje su bili uključeni učenici, umjetnici, sportisti, privrednici, te građani i čelnici dva grada. Izraženo je uvjerenje da će se kroz nove ideje i projekte uspostavljati nove i unaprijediti postojeće veze.

Njemačka delegacija je u pratnji zamjenika gradonačelnika Milana Trivića, 3. oktobra posjetila Dom zdravlja „Omer Maslić“. Delegaciju je pozdravila direktorica Zumreta Bihorac-Kučuk, a obzirom da Grad Friedrichshafen ima namjeru finansirati ugradnju lifta za invalidna lica i majke s djecom, Bihorac – Kučuk je prezentirala trenutni status projekta, naglasivši da je u toku priprema potrebne projektne dokumentacije.

Uža delegacija posjetila je Međunarodni centar za djecu i omladinu Novo Sarajevo, gdje ih je ugostila direktorica Centra Zorica Miličević i načelnik Općine Novo Sarajevo Nedžad Koldžo. Povod posjete bio je, pored ostalog, uspostava saradnje između dvije omladinske

kulturne ustanove, Međunarodnog centra za djecu i omladinu Novo Sarajevo i omladinskog centra u Friedrichshafenu, na način da mladi glumci Međunarodnog centra gostuju na Internacionalnim teatarskim igrama koje će se održati u Friedrichshafenu od 03. do 09.04.2018. godine.

Ispred Grada Sarajeva prijemu je prisustvovala pomoćnica gradonačelnika za lokalnu samoupravu i razvoj grada Dragana Solaković.

Delegacija je posjetila i Centar za zdravo starenje Novo Sarajevo kojem je Udruženje „Pro Sarajevo“ doniralo 500 eura.

Sastanak s direktoricom Ureda Grada Beča u inostranstvu Berinom Filipović - Kulenović, 20.10.2017.

Predstavnice Gradske službe za lokalnu samoupravu i razvoj grada i Gradske službe za finansije, održale su sastanak s direktoricom Ureda Grada Beča u inostranstvu Berinom Filipović- Kulenović.

Nakon što je Filipović - Kulenović ukratko predstavila aktivnosti Ureda Grada Beča u Sarajevu, utvrđeni su tehnički detalji posjete gradonačelnika Grada Sarajeva gradonačelniku Grada Beča, 30.11.2017. godine.

Razgovarano je o predstojećim aktivnostima Ureda Grada Beča i organizaciji manifestacija s fokusom na Beč, kao što su Dani Beča u Sarajevu, Dana Sarajeva u Beču i Austrijski bal u Vijećnici.

Na kraju, Filipović - Kulenović izrazila je svoje očekivanje da će u cilju održavanja kontinuiteta u saradnji, predstavnici Grada Sarajeva prisustvovati događajima koje u Sarajevu organizira Ured Grada Beča.

Potpisan "Protokol o saradnji između Grada Sarajeva i Centralnog administrativnog okruga Grada Moskva", Sarajevo, 27. - 29.10.2017.

Gradonačelnik Sarajeva Abdulah Skaka i prefekt Centralnog administrativnog okruga Grada Moskve Vladimir Goverdovsky u Vijećnici su potpisali Protokol o saradnji s ciljem jačanja postojećih odnosa i razvoja prijateljskih veza. Protokolom je predviđena saradnja u oblasti obrazovanja, kulture, sporta i turizma, te razmjena iskustava i delegacija stručnjaka u oblasti komunalne privrede i urbanizma.

Gradonačelnik Sarajeva Abdulah Skaka istaknuo je da je Protokolom ozvaničen početak saradnje između dvije administracije, a da je sljedeći korak razmjena informacija i pozitivnih iskustava na osnovu kojih bi pristupili izradi i realizaciji konkretnih projekata od obostranog interesa.

Skaka je predložio da se u Vijećnici održi koncert Moskovske filharmonije.

Razgovaralo se i o učestvovanju na festivalima turizma u Sarajevu i Moskvi, kako bi se njihovi građani, gosti i turisti upoznali s kulturno-historijskim i prirodnim resursima dva grada.

Ovom prilikom dogovoren je dolazak ruskog novinara u Sarajevo, kako bi napravio reportažu o glavnom gradu BiH, te na taj način približio ljepote, život, običaje našeg grada koji se trenutno nalazi među 20 najpoželjnijih i najposjećenijih turističkih destinacija u Europi.

Prefekt Vladimir Goverdovsky je kazao da je Centralni administrativni okrug Grada Moskve otvoren za saradnju sa Sarajevom u oblasti kulture, turizma i komunalne privrede.

Potpisivanju Protokola prisustvovali su predsjedavajući Gradskog vijeća Sarajeva Igor Gavrić, zamjenici gradonačelnika Sarajeva Ivica Šarić i Milan Trivić, te zamjenici prefekta Centralnog administrativnog okruga Grada Moskve, Sergey Travkin i Andrey Prishchepov.

Službena posjeta delegacije Grada Sarajeva Gradu Beogradu, 29. - 30.10.2017.

Na poziv gradonačelnika Grada Beograda Siniše Malija, gradonačelnik Sarajeva mr. Abdulah Skaka, predsjedavajući Gradskog vijeća dr. Igor Gavrić, te gradski vijećnici Nuko Grebović, Miro Lazović i Srđan Simonović boravili su u prvoj zvaničnoj posjeti srbijanskoj prijestolnici, koja nije bila samo protokolarna već i radnog karaktera.

Gradonačelnici Skaka i Mali donijeli su niz zaključaka u cilju unaprijeđenja odnosa između dva grada u oblasti turizma, privrede, kulture, sporta i mladih za naredni period.

Između ostalog, razgovarajući o EYOF-u, čelnici Beograda izrazili su spremnost da podrže jednu od najznačajnijih sportskih manifestacija u ovom dijelu Evrope koja će se u Sarajevu i Istočnom Sarajevu održati 2019. godine. Najavljeno je potpisivanje sporazuma između Sarajeva, Istočnog Sarajeva i Beograda o saradnji na projektu EYOF u vidu razmjene mladih.

S obzirom na činjenicu da Sarajevo i Beograd postaju najpoželjnije i najposjećenije evropske turističke destinacije, gradonačelnici su se usaglasili i u vezi sa zajedničkim nastupom prema turistima iz Evrope i svijeta, a posebno iz Kine.

Kad je riječ o kulturi, dogovoreno je gostovanje Sarajevske filharmonije u Beogradu, odnosno beogradske u Sarajevu, kao i češća gostovanja pozorišnih kuća iz dva grada. Poseban akcent tokom razgovora stavljen je na aktivnosti usmjerene ka pružanju šanse mladima.

Skaka je, s tim vezi, pozvao predstavnike Grada Beograda da prisustvuju Drugom regionalnom forumu inovacija „Sarajevo Unlimited 2017“, koji će se održati naredne sedmice, a što je Mali vrlo rado prihvatio. Također, razmjenjena su i iskustva u pogledu primjene javno-privatnog partnerstva u razvoju gradova. Na kraju, Skaka se srdačno zahvalio na dočeku te pozvao gradonačelnika Beograda da posjeti glavni grad BiH

Delegaciju Grada Sarajeva činili su i savjetnici gradonačelnika Ensar Eminović i Erna Čolić, pomoćnica gradonačelnika za lokalnu samoupravu i razvoj grada Dragana Solaković, i šefica Odjeljenja za međunarodnu saradnju i EU integracije Merima Hadžiabdić.

Obilježavanje Dana oslobođenja Skoplja

Potpisivanje Sporazuma o bratimljenju između Grada Skoplja i Grada Sarajeva, Skoplje, 13. - 14.11.2017.

Na poziv novoimenovanog gradonačelnika Grada Skoplja Petre Shilegova, delegacija Grada Sarajeva predvođena gradonačelnikom Abdulahom Skakom, prisustvovala je obilježavanju Dana grada Skoplja – 13. novembra.

Na temelju prijateljskih odnosa gradova Sarajeva i Skoplja, a u želji da se postojeći nivo saradnje unaprijedi, gradonačelnici Abdulah Skaka i Petre Shilegov potpisali su 14. novembra *Sporazum o bratimljenju između Grada Skoplja i Grada Sarajeva*. Osim toga, u cilju razmjene iskustava vezanih za upravljanje i transport žičarom, potpisan je sporazum između JP „Sarajevo“ d.o.o. i Javnog saobraćajnog preduzeća “Skopje”.

Pored gradonačelnika, delegaciju Grada Sarajeva činili su gradski vijećnici Toni Vukadin i Almedin Miladin, savjetnik gradonačelnika Ensar Eminović, direktor JP Sarajevo d.o.o. Esad Tanović, i stručna saradnica Nejra Selimović.

Prvi sarajevski dani u Ankari, 27. - 29.11.2017.

Kulturna manifestacija “Prvi sarajevski dani u Ankari”, održana je u organizaciji Udruženja balkanskih kultura (BAKIDER), u Ankari 28.11.2017. godine.

Manifestacija je održana cilju jačanja kulturnih veza između turskog naroda i naroda balkanskih zemalja.

U ime Grada Sarajeva, događaju su prisustvovali savjetnik gradonačelnika za međunarodnu saradnju i europske integracije Ensar Eminović i Azra Kurtagić Smajić.

Posjeta delegacije Grada Sarajeva gradonačelniku Grada Beča, 30.11.2017.

Na poziv gradonačelnika Grada Beča Michaela Häupla, delegacija Grada Sarajeva na čelu s gradonačelnikom Abdulahom Skakom, boravila je u službenoj posjeti Beču 30.11.2017. godine.

Gradonačelnik Grada Beča prihvatio je prijedlog da početkom naredne godine Sarajevo i Beč organiziraju veliki događaj koji će okupiti značajne lidere gradova regiona uz učešće gradova centralne Europe.

Gradonačelnik Skaka izrazio je zadovoljstvo susretom s osvjedočenim prijateljima Sarajeva i BiH sa kojima nas kroz historiju vežu posebno bliske veze. Zahvalio se Gradu Beču i Austriji za dosadašnju pomoć Sarajevu i BiH posebno naglasivši ulogu gradonačelnika Häuplea koji je više od 20 godina na čelu Beča što potvrđuje kako građani prepoznaju rezultate. Također je istaknuo želju za intenziviranjem saradnje glavnih gradova na svim nivoima, razmjenom informacija i iskustava iz različitih oblasti, a produkt te saradnje bili bi konkretni projekti od interesa za građane.

Razgovarano je i o obnovi Stare željezničke stanice u sarajevskom naselju Bistrik koju ova gradska administracija želi revitalizirati, pri čemu je gradonačelnik Skaka naglasio da bi ovaj reprezentativni objekt velike historijske vrijednosti mogao biti mjesto susreta, kulturnih događaja i historijske postavke.

U fokusu susreta bilo je i planirano organiziranje manifestacija “Dani Sarajeva u Beču“, odnosno „Dani Beča u Sarajevu“ s ciljem promocije kulture i turizma, te zbližavanja umjetnika i građana ova dva grada.

Također, razgovaralo se i o razmjeni znanja i iskustava u pogledu provođenja projekata tzv. pametnih gradova te o primjeni javno-privatnog partnerstva kao razvojnog modela.

Obilježavanje 10 godina prijateljskih veza između Sarajeva i Dubrovnika, Sarajevo, 08.12.2017.

Povodom obilježavanja 10 godina prijateljskih veza između Sarajeva i Dubrovnika, gradonačelnik Sarajeva Abdulah Skaka sa saradnicima, primio je u Vijećnici 08.12.2017. godine delegaciju Grada Dubrovnika predvođenu zamjenicom gradonačelnika Dubrovnika Jelkom Tepšić.

Tokom prijema razgovarano je o unaprjeđenju međusobnih odnosa, pri čemu su se sagovornici složili da Sarajevo i Dubrovnik njeguju dobre odnose, najviše na planu kulture. Međutim, istakli su da ima još mnogo prostora u kojima bi mogli osnažiti saradnju. Zaključeno je da je ovo pravi trenutak za novi početak, osnaživanje saradnje i razmjene iskustava na projektima iz oblasti turizma, infrastrukture i očuvanja kulturno-historijskog naslijeđa Sarajeva i Dubrovnika.

Gosti iz Dubrovnika su poslije prijema, ispred Katedrale upriličili prigodan program za građane i posjetioce Sarajeva koji su uživali u tradicionalnoj dubrovačkoj kolendi u izvedbi klape Kaše i gastronomskoj ponudi.

Donacija knjiga dobitnika Dejtonske književne nagrade za mir JU Biblioteka Sarajeva, 11.12.2017.

Grad Dejton donirao je JU Biblioteka Sarajeva kopije 57 knjiga na engleskom jeziku, kojima je dodijeljena *Dejtonska književna nagrada za mir*.

Dejtonska književna nagrada za mir je nagrada kojom se obilježava snaga književnosti u promoviranju mira i koja se dodeljuje u američkom gradu Dejtonu. Dejtonska književna nagrada za mir koja se dodeljuje za životno djelo, prvi put je dodijeljena 2006. godine, a inspirisana je Dejtonskim mirovnim sporazumom.

IPA PROGRAM PREKOGRANIČNE SARADNJE SRBIJA I BIH

Grad Sarajevo kao vodeći aplikant, zajedno sa Zavodom za zaštitu spomenika kulture Kraljevo i Kulturnim centrom "Vuk Karadžić" iz Loznice kao koaplikantima, kandidirao je projektnu ideju "Muzejska priča" za finansiranje iz IPA programa prekogranične saradnje Srbija i BiH.

Radi se o projektu vrijednosti cca. 550.000,00 EUR, čiji korisnici će biti muzeji iz Sarajeva (Zemaljski muzej, Historijski muzej, Muzej grada Sarajeva, Olimpijski muzej, Muzej književnosti i pozorišne umjetnosti) i muzeji iz Srbije.

Planirane aktivnosti u okviru projekta su:

- Kreiranje neformalne mreže muzeja u programskom području
- Izrada web stranice Mreže muzeja
- Obuka u digitalizaciji muzejskih postavki
- Nabavka opreme za digitalizaciju
- Organiziranje Noći muzeja
- Izrada Muzejske kartice
- Razmjena muzejskih postavki između država (gostovanja muzejskih postavki između muzeja)
- Izrada i izdavanje muzejskih kataloga i filmova
- Produkcija muzejskih izložbi
- Zajednička aktivnost na zaštiti kulturno-historijskih spomenika.

Koncept nota predata je 16.11.2017. godine, a cjelokupan proces apliciranja obavljen je uz pomoć SERDE i Zlatiborske razvojne agencije.

IV. SARADNJA S DIPLOMATSKO-KONZULARNIM PREDSTAVNIŠTVIMA

U izvještajnom periodu Gradsku upravu Grada Sarajeva posjetili su ambasadori i predstavnici diplomatsko-konzularnih predstavništava: Kraljevine Tajland, Narodne Demokratske Republike Alžir, Republike Italije, Švicarske Konfederacije, Narodne Republike Kine i Republike Francuske, Republike Slovenije, Države Palestine, Japana, Republike Austrije, Ruske Federacije, Islamske Republike Iran, Kraljevine Španije, Misije OSCE-a u BiH, Države Kuvajt, Republike Makedonije, Mađarske, Ureda Ambasade Ukrajine, Republike Indonezije, Švicarske Konfederacije, Kraljevine Norveške, Vatikana, Republike Srbije, NR Kine, Delegacije EU u BiH, Kraljevine Holandije, Visokog predstavnika za BiH, Argentine.

Radna posjeta predstavnika Ambasade Kraljevine Tajland, Vijećnica, 08.02.2017.

Predstavnici Ambasade Kraljevine Tajland sa sjedištem u Budimpešti boravili su u Sarajevu u svrhu priprema za predstojeću posjetu Njenog Kraljevskog Veličanstva princeze Maha Chakri Sirindhorn Bosni i Hercegovini. Tim povodom delegacija Ambasade Kraljevine Tajland predvođena otpravnikom poslova Torom Saralambom, posjetila je Vijećnicu kako bi se utvrdili detalji posjete princeze.

Prijem ambasadora Alžira Abdelhamida Senouci Bereksija, Vijećnica, 09.02.2017.

Gradonačelnik Sarajeva Abdulah Skaka primio je u nastupnu posjetu nerezidentnog ambasadora Narodne Demokratske Republike Alžir Abdelhamida Senouci Bereksija. Tokom razgovora podsjetili su na sporazum o bratimljenju između Sarajeva i alžirskog grada Tlemsena iz 1964. godine i složili se da postoji potreba za obnovom saradnje, posebno u oblasti kulture.

Ambasador je izrazio svoje oduševljenje Sarajevom i srdačnošću Sarajlija, te istakao da postoje mnoge kulturne i historijske sličnosti i poveznice između dvije zemlje, posebno se osvrnuvši na zajedničke vrijednosti: multikulturalnost i suživot različitih kultura i tradicija.

Prijem zamjenika ambasadora Republike Italije u BiH, Gradska uprava, 09.02.2017.

Na zahtjev Ambasade Republike Italije u BiH, zamjenik gradonačelnika Sarajeva Ivica Šarić primio je zamjenika ambasadora Alberta Comita.

Comito je prenio prijedlog Grada Rima da s Gradom Sarajevo ostvari saradnju u okviru EU programa *Europe for Citizens*.

U okviru navedenoga programa gradovi Sarajevo i Rim bi aplicirali za sredstva za zajednički projekat povodom obilježavanja 60. godišnjice potpisivanja *Rimskih ugovora* 1957. godine, kojima su osnovane Europska ekonomska zajednica i Europska atomska zajednica.

Saradnja gradova Sarajevo i Rim odvijala bi se u tri područja:

1. Međusobne posjete rukovodstava dva grada,
2. Saradnja univerziteta dva grada,
3. Saradnja Sarajevo Film Festivala i Rome Film Festivala.

U toku su aktivnosti razmjene informacija potrebnih za popunjavanje aplikacije za sredstva za zajednički projekat dva grada.

Dani kulture Irana, 13. - 17.02.2017.

Dani kulture Irana 2017. svečano su otvoreni koncertom tradicionalne iranske muzike i izložbom iranskih umjetnika, u Vijećnici, 13.02.2017. godine.

Osam iranskih umjetnika predstavili su svoje radove kroz izložbu koju su činili kaligrafski radovi, iranske minijature, drvorezi i ruktvorine, a predstavljena je i jedinstvena izložba fotografija Isfahana.

Dane kulture Irana zajedno su realizirali Ambasada IR Iran - Iranski kulturni centar u Sarajevu, Grad Sarajevo, Likovna i Muzička akademija, Federalno ministarstvo kulture i sporta, te Fondacija za muzičke, scenske i likovne umjetnosti pomenutog ministarstva.

Prijem ambasadorice Švicarske Konfederacije, Vijećnica, 23.02.2017.

Ambasadorica Švicarske Konfederacije u BiH Andrea Rauber Saxer posjetila je gradonačelnika Sarajeva Abdulaha Skaku u Vijećnici, kako bi mu čestitala na imenovanju.

Gradonačelnik Skaka i ambasadorica Rauber Saxer složili su se da je dosadašnja saradnja između Grada Sarajeva i Ambasade Švicarske Konfederacije bila izrazito uspješna, te su izrazili nadu da će se ona nastaviti i u budućnosti.

Tokom prijema razgovaralo se o izmještanju donirane žičare iz švicarskog grada Grächena, koja je smještena u bazi EUFOR-a u Butmiru. Gradonačelnik Skaka naglasio je da će uložiti dodatni napor kako bi se što prije pronašlo adekvatno rješenje.

Prijemu je prisustvovao i donator dr. Edmond Offermann koji je izrazio zadovoljstvo očekivanim početkom izgradnje nove žičare u aprilu ove godine.

Prijem ambasadorice NR Kine, Vijećnica, 23.02.2017.

Gradonačelnik Sarajeva Abdulah Skaka primio je ambasadoricu NR Kine Chen Bo, koja mu je čestitala na imenovanju. Ambasadorica Bo uručila je gradonačelniku čestitku Wang Dongfenga, gradonačelnika Grada Tjencina s kojim je Sarajevo u pobratimskim vezama od 1981. godine.

Ovom prilikom ambasadorica je pozvala gradonačelnika Sarajeva da učestvuje na Samitu gradonačelnika Kine i gradova zemalja Srednje i Istočne Europe, u kineskom gradu Ningbo, 07. i 08.06.2017. godine.

Sudionici prijema ocijenili su da je potrebno u narednom periodu intenzivirati međusobnu saradnju u oblasti kulture i privrede.

Prijem ambasadorice Republike Francuske, Vijećnica, 28.02.2017.

Gradonačelnik Sarajeva Abdulah Skaka primio je ambasadoricu Republike Francuske Claire Bodony, koja mu je čestitala na imenovanju.

Ambasadorica je iskazala interesovanje za projekat EYOF 2019, te istakla da se francuska Ambasada zalaže i podržava lokalne vlasti kako bi organizacija zimskih olimpijskih igara mladih bila uspješna. Sudionici prijema složili su se da će se organizacijom EYOF 2019 iz Sarajeva i Istočnog Sarajeva poslati veoma lijepa slika širom cijele Europe.

Prijem ambasadora Republike Slovenije u BiH, 08.03.2017.

Gradonačelnik Sarajeva Abdulah Skaka primio je ambasadora Republike Slovenije u BiH Iztoka Grmeka sa saradnicima.

Ambasador Grmek čestitao je gradonačelniku na izboru i poželio uspješan rad. Gradonačelnik Sarajeva upoznao je ambasadora o projektima koje će Grad Sarajevo realizirati u narednom periodu.

Ambasador Grmek zamolio je gradonačelnika Sarajeva da se izložba, kojom će se obilježiti 60. godišnjica od smrti slovenskog arhitekta Jože Plečnika, postavi u Vijećnici, što je gradonačelnik prihvatio. Izložba je bila postavljena od 23.05. do 08.06.2017. godine.

Prijem ambasadora Države Palestine u BiH, 09.03.2017.

Gradonačelnik Sarajeva Abdulah Skaka primio je u kurtoaznu posjetu ambasadora Palestine u BiH Rezeq Namooru i prvog savjetnika Ambasade Mohammeda Hammada. Sagovornici su dali osvrt na dugogodišnje prijateljstvo i dosadašnju uspješnu saradnju između BiH i Države Palestine.

Ambasador Namoor je upoznao gradonačelnika Sarajeva s trenutnom teškom situacijom u Palestini kroz koju prolazi palestinski narod.

Obje strane izrazile su spremnost za unapređenje saradnje u različitim oblastima kroz konkretne projekte, pri čemu je ambasador Namoor predložio da se u Sarajevu održi izložba slika svjetski poznatih likovnih umjetnika iz Palestine, što je gradonačelnik prihvatio.

Prijem ambasadora Japana u BiH, 10.03.2017.

Gradonačelnik Sarajeva Abdulah Skaka susreo se s ambasadorom Japana u BiH Kazuya Ogawom koji mu je čestitao na izboru za gradonačelnika. Gradonačelnik Skaka se ovom prilikom zahvalio Vladi i narodu prijateljskog Japana, koji je kao jedan od najvećih bilateralnih donatora, odigrao značajnu ulogu u poslijeratnoj rekonstrukciji Sarajeva i BiH.

Obje strane su izrazile zadovoljstvo uspostavljanjem prijateljskih odnosa između Sarajeva i Hirošime. Gradonačelnik Skaka je iskazao spremnost Grada da, u okvirima svojih mogućnosti, pruži što je potrebno za organizaciju manifestacije *Dani Japana u Sarajevu*, koja bi približila kulturu ove prijateljske zemlje građanima bh. prijestolnice.

Prijem ambasadora Republike Austrije u BiH, 17.03.2017.

Gradonačelnik Sarajeva Abdulah Skaka primio je 17.03.2017. godine ambasadora Republike Austrije u BiH Martina Pammera koji mu je čestitao na imenovanju. Tokom susreta razgovaralo se o dosadašnjoj saradnji Sarajeva i austrijskih gradova, kao i o planovima za budućnost.

Ambasador Pammer upoznao je gradonačelnika o namjeri Ambasada Austrije u BiH da organizira Prvi austrijski bal u Sarajevu 20.05.2017. godine, te zamolio gradonačelnika za ustupanje Vijećnice, što je i prihvaćeno.

Prijem ambasadora Ruske Federacije u BiH, 20.03.2017.

Gradonačelnik Sarajeva Abdulah Skaka primio je 20.03.2017. godine ambasadora Ruske Federacije u BiH Petra Ivantsova koji mu je čestitao na izboru za gradonačelnika.

Ambasador Ivantsov uručio je gradonačelniku pismo u koje se navodi da je, na osnovu Pisma namjere Grada Sarajeva iz decembra 2016. god., Prefektura centralnog administrativnog okruga Grada Moskva izrazila želju za uspostavljanje prijateljskih i partnerskih veza s Gradom Sarajevu i s tim u vezi posjete predstavnika Prefektore Grada Sarajevu.

Gradonačelnik Sarajeva upoznao je ambasadora s procedurom uspostavljanja saradnje, te je dogovoreno da se, nakon što se usaglasi tekst Sporazuma u saradnji, odnosno Gradsko vijeće Grada Sarajeva donese Odluku o uspostavljanju saradnje, dogovori termin potpisivanja Sporazuma i dolaska delegacije iz Moskve.

Prijem ambasadora IR Iran u BiH, 30.03.2017.

Gradonačelnik Sarajeva Abdulah Skaka primio je ambasadora IR Iran u BiH Mahmouda Heidarija koji mu je čestitao na izboru za gradonačelnika.

Ambasador Heidari izrazio je uvjerenje da će tokom mandata gradonačelnika doći do intenzivnog povezivanja glavnih gradova dvije države, međusobnog upoznavanja i razmjene iskustava. Također, ambasador se zahvalio Gradu Sarajevu na pruženoj podršci u realizaciji kulturne manifestacije *Dani Irana u Sarajevu*, održanoj u gradskoj Vijećnici u februaru 2017., tokom koje su građani i gosti grada imali priliku da prisustvuju koncertu tradicionalne iranske muzike i pogledaju izložbu iranskih umjetnika.

Gradonačelnik Skaka je potvrdio obostranu naklonost i veliko prijateljstvo između naroda i država IR Iran i BiH i dva pobratimska grada, Sarajeva i Teherana, te istakao zainteresiranost za nastavak saradnje u oblasti kulture, turizma, te definisanje konkretnih budućih odnosa i projekata, koje bi realizirali na obostrano zadovoljstvo.

Gradonačelnik Sarajeva je zamolio ambasadora da prenese poziv gradonačelniku Teherana da posjeti glavni grad BiH.

Prijem ambasadora Kraljevine Španije u BiH, 04.04.2017.

Gradonačelnik Sarajeva Abdulah Skaka primio je ambasadora Kraljevine Španije u BiH Boscoa Gimeneza Soriana i zamjenika ambasadora Javiera Blancoa koji su mu čestitali na izboru za gradonačelnika.

Sagovornici su se osvrnuli na značaj sarajevske Vijećnice koja je spaljena tokom agresije na BiH i za čiju obnovu je Kraljevina Španija donirala milion eura, na čemu je gradonačelnik Skaka zahvalio.

Izražena je želja za intenziviranjem saradnje između Sarajeva i Madrida, gradova potpisnika sporazuma o bratimljenju 2007. godine.

Osvrnuvši se na primjetan porast turističkih posjeta u Sarajevu, naročito turista iz Španije, ambasador Soriano iznio je svoju impresiju da bi obnova rezidencije Konak i nacionalnog

spomenika Kasarne Jajce, značajno doprinijela imidžu grada Sarajeva. Gradonačelnik se složio s navedenim, te je upoznao ambasadora s namjerom Grada Sarajeva da obnovi Olimpijski muzej i zgradu željezničke stanice Bistrik.

Gradonačelnik je predložio da se održi koncert Madridske filharmonije u Vijećnici krajem ove godine, te je pozvao jednog od poznatih španskih novinara da u vrijeme održavanja SFF-a posjeti Sarajevo i napravi reportažu o glavnom gradu BiH.

Prijem zamjenika šefa Misije OSCE-a u BiH, 24.04.2017.

Gradonačelnik Sarajeva Abdulah Skaka sastao se sa zamjenikom šefa Misije OSCE u BiH Alexanderom Chuplyginom sa kojim je razgovarao o dosadašnjoj saradnji između Misije OSCE-a i Grada Sarajeva, te projektima Grada Sarajeva.

Obzirom na iskazano interesovanje, gradonačelnik Skaka upoznao je svog sagovornika sa sastankom koji je na njegovu inicijativu održan s načelnicima četiri gradske općine kako bi se usaglasili stavovi lokalnih zajednica u pogledu izmjena i dopuna Ustava KS, Zakona o prostornom uređenju KS i Zakona o osnovnom odgoju i obrazovanju.

Chuplygin je dao osvrt na djelovanje Aarhus Centra Sarajevo, koji je otvoren 30.05.2012. god. potpisivanjem *Memoranduma o razumijevanju između Misije OSCE-a u BiH i Grada Sarajeva*, te zahvalio na ranijoj finansijskoj podršci Grada Sarajeva Aarhus centru. Također, zamolio je da se razmotri mogućnost nastavka podrške i međusobne saradnje.

Prvi austrijski bal, 20.05.2017.

U organizaciji Ambasade R Austrije u BiH, te uz podršku Beča i Sarajeva, Prvi austrijski bal održan je Vijećnici 20.05.2017. godine. Time je Sarajevo postao jedan od 40 gradova svijeta u kojima se održava ova manifestacija, među kojima su Pariz, London, Tokio, Sankt-Peterburg. Ambasador R Austrije u BiH Martin Pammer, kazao je da glavni povod organizacije ovog bala prijateljske veze dvije države, te njihovih glavnih gradova Sarajeva i Beča, kao i obilježavanje 150 godina valcera *Na lijepom plavom Dunavu*.

Učesnike manifestacije pozdravio je gradonačelnik Abdulah Skaka, i vijećnik iz Beča Ernst Woller koji je zvaničama prenio prijateljske pozdrave gradonačelnika Michaela Häupla.

Prvi austrijski bal u Sarajevu počeo je intoniranjem himni Bosne i Hercegovine i R Austrije, kao i izvedbom Ode radosti. Uvodni dio bio je i špalir učesnika, plesnih parova, te članova folklornih sekcija, a potom je KUD Bašćaršija izvelo narodne igre iz Bosne i Hercegovine, dok je orkestar Bečkog Opernog bala izveo Bečki valcer.

Izložba Plečnikova Ljubljana, 23.05.2017.

U organizaciji Ambasade Republike Slovenije u BiH, izložba o stvaralaštvu velikog slovenačkog i europskog arhitekta umjetnika Jože Plečnika - *Plečnikova Ljubljana* otvorena je u Vijećnici 23.05.2017. godine. U Vijećnici su bili izloženi panoji s fotografijama djela i

pisanim detaljima o karakteristikama objekata - ljubljanskih znamenitih zgrada, ulica, crkava, biblioteka...

Izložba je organizirana u saradnji s Ministarstvom za kulturu R Slovenije, Muzejom za arhitekturu i dizajn u Ljubljani, Muzejem i galerijom grada Ljubljane (Plečnikova kuća), uz podršku Grada Sarajevo.

Otvorenom je izložbu proglasio bh. arhitekta slovenačkog porijekla Ivan Štraus, a pored zamjenika gradonačelnika Milana Trivića, zvanicama su se obratili i ambasador R Slovenije Iztok Grmek, bh. arhitekta Nihad Babović, te slovenačka arhitektica Barbara Rozman Bider.

Prijem ambasadora IR Pakistan u BiH, 24.05.2017.

Gradonačelnik Sarajeva Abdulah Skaka primio je u nastupnu posjetu novoimenovanog ambasadora IR Pakistan u BiH Salima Nawaza, kojemu je poželio uspješan mandat.

Ocijenjeno da su odnosi BiH i IR Pakistana veoma dobri, ali da ih ne prati i uspješna poslovna saradnja. S tim u vezi, razgovarano je o mogućnostima daljeg razvoja i produbljivanja odnosa dvije prijateljske zemlje, te njihovih prijestolnica, Sarajeva i Islamabada, koje imaju veliki potencijal za buduću saradnju. Istaknuto je postojanje interesa da se pored poslovne, saradnja unaprijedi i u oblasti privrede i kulture.

Prijem ambasadora Države Kuvajt u BiH, 24.05.2017.

Gradonačelnik Sarajeva Abdulah Skaka upriličio je prijem za ambasadora Države Kuvajt u BiH Nassera Reden Al Motairia.

Ambasador je informirao gradonačelnika o mogućnosti finansijske podrške projektu od općeg značaja u Sarajevu, pod uslovom da isti nosi naziv po Državi Kuvajt.

Gradonačelnik Skaka je predložio i prezentirao projekat parka Dariva, čija obnova iznosi milion eura, te u dogovoru s ambasadorom obećao da će osigurati fizibiliti studiju, potvrdu da zemljište nije u privatnom vlasništvu i pismo preporuke člana Predsjedništva BiH Bakira Izetbegovića.

Prijem otpravnika poslova Ambasade Republike Makedonije u BiH, 01.06.2017.

Gradonačelnik Sarajeva Abdulah Skaka primio je otpravnika poslova Ambasade Republike Makedonije u BiH Aleksandra Krstevskog i makedonskog biznismena Ahmeta Kočana, koji su upoznali gradonačelnika s aktualnom političko – ekonomskom situacijom u Makedoniji, te reformama u gradskoj i državnoj upravi.

Razgovarano je o mogućnostima jačanja saradnje između dvije države i ocijenjeno je da postoji mnogo oblasti za saradnju između Sarajeva i Skoplja.

Dogovoreno je da Spomen – kuća Majke Tereze iz Skoplja organizira izložbu u Vijećnici.

Prijem ambasadora Mađarske u BiH, 12.06.2017.

Gradonačelnik Sarajeva Abdulah Skaka upriličio je prijem za ambasadora Mađarske u BiH Józsefa Négyesija. Gradonačelnik Skaka zahvalio je Vladi Mađarske i gradovima Budimpešti i Pečuhu na doniranim sredstvima za obnovu sarajevske Vijećnice.

Ocijenjeno je da Sporazum o saradnji između Sarajeva i Budimpešte, potpisan u septembru 2016. godine, predstavlja dobru osnovu za konkretizovanje saradnje na svim područjima od interesa za građane dva grada.

Ambasador Négyesi iskazao je spremnost svoje zemlje da nastavi s podrškom BiH na njenom putu ka članstvu u EU.

Prijem šefa Ureda Ambasade Ukrajine, 12.06.2017.

Gradonačelnik Sarajeva Abdulah Skaka primio je šefa sarajevskog Ureda Ambasade Ukrajine Volodymyra Tsybulnyka. Tokom prijema razgovarano je o dosadašnjoj saradnji dviju prijateljskih zemalja, te o uspostavljanju snažnijih odnosa, pogotovo u oblasti kulture i privrede.

Gradonačelnik Skaka zahvalio je g. Tsybulnyku na interesu za glavni grad naše države, te ga upoznao s projektima Grada Sarajeva.

Sastanak s članicama Organizacionog odbora Diplomatskog zimskog bazara, 16.06.2017.

Gradonačelnik Sarajeva Abdulah Skaka upriličio je prijem za supruge ambasadora u BiH koje djeluju u Organizacionom odboru Diplomatskog zimskog bazara.

Cilj ove manifestacije je prikupiti novac u dobrotvorne svrhe i podijeliti ga organizacijama koje se brinu o djeci s posebnim potrebama i djeci čije su porodice u stanju socijalne potrebe.

Grad Sarajevo je podržao ovaj tradicionalni humanitarni događaj koji je održan u dvorani "Mirza Delibašić" 09.12.2017. godine.

Prijem ambasadorice Indonezije u BiH, 20.06.2017.

Gradonačelnik Sarajeva Abdulah Skaka primio je ambasadoricu Indonezije u BiH Ameliju Achmad Yani, s kojom je razgovarao o uspostavljanju snažnijih odnosa i saradnje između Bosne i Hercegovine i Indonezije, te njihovih glavnih gradova Sarajeva i Džakarte, naročito u oblasti turizma.

Ambasadorica Achmad Yani zahvalila je gradonačelniku na dobrodošlici i prijemu, te ga pozvala da bude gost na najvećem trgovinskom sajmu TRADE EXPO 2017., koji će se održati u oktobru ove godine u Indoneziji.

Prijem ambasadorice Švicarske Konfederacije u BiH, 20.06.2017.

Gradonačelnik Sarajeva Abdulah Skaka primio je ambasadoricu Švicarske Konfederacije Andreu Rauber Saxer u Vijećnici.

Povodom obilježavanja 25 godina bilateralne saradnje između BiH i Švicarske Konfederacije, ambasadorica Rauber Saxer pozvala je gradonačelnika Skaku na prijem u Ambasadu, te na koncert koji je potom uslijedio u Vilsonovom šetalištu 01.08.2017. godine.

Gradonačelnik Skaka je upoznao ambasadoricu Rauber Saxer s trenutnim i budućim projektima Grada Sarajeva posebno u oblasti urbanog planiranja, istakavši dobru saradnju između Grada Sarajeva i ETH Instituta iz Zuricha, jednog od najboljih projektantskih instituta u Europi.

Prijem ambasadora Republike Italije u BiH, 23.06.2017.

Gradonačelnik Sarajeva Abdulah Skaka primio je u nastavnu posjetu ambasadora Republike Italije Nicolu Minasija, kojem je poželio uspješan mandatni period u BiH.

Dogovoren je nastavak saradnje na realizaciji projekta Ars Aevi što ima za cilj izgradnju muzeja savremene umjetnosti u Sarajevu prema projektu čuvenog Renza Piana.

Razgovaralo se o uspostavljanju posebnih odnosa između glavnih gradova – Sarajeva i Rima, koji mogu pronaći zajednički interes i uspostaviti dijalog i saradnju, posebno kad je riječ o kulturi i turizmu.

Nastupna posjeta ambasadora Francuske u BiH, 31.07.2017.

Gradonačelnik Sarajeva Abdulah Skaka primio je u nastavnu posjetu ambasadora Francuske u BiH Guillaume Roussona, kojem je poželio uspješan mandat i dobrodošlicu.

Razgovarano je o uspostavljanju saradnje između dva glavna grada, Sarajeva i Pariza, posebno u oblasti kulturne razmjene, a ambasador je podsjetio i na početak partnerstva između Muzeja Louvre i Zemaljskog muzeja BiH.

Gradonačelnik je predložio nastup francuske filharmonije u Vijećnici okviru obilježavanja 9. maja – Dana pobjede nad fašizmom i Dana Europe, a ambasador je predložio i neke aktivnosti u okviru *Praznika muzike* koji se tradicionalno održava 21. juna.

Nastupna posjeta ambasadorice Kraljevine Norveške u BiH, 08.08.2017.

Prilikom prijema ambasadorice Kraljevine Norveške u BiH Guri Rusten u nastavnu posjetu, gradonačelnik Sarajeva Abdulah Skaka izrazio je zadovoljstvo dobrim bilateralnim odnosima Bosne i Hercegovine i Kraljevine Norveške.

Obzirom na interesovanje koje iskazala ambasadorica Rusten, gradonačelnik Skaka govorio je o potencijalima koje Sarajevo i BiH ima, bogatoj kulturno – historijskoj baštini, jedinstvu različitih religija i kultura, prirodnim atrakcijama.

Prijem ambasadora Vatikana u BiH, 23.08.2017.

Gradonačelnik Abdulah Skaka primio je 23.08.2017. godine ambasadora Vatikana msgr. Luigija Pezzuta i župnika grada Cavallino u Italiji velečasnog Gaetana Tornesea.

Gradonačelnik Skaka je iskazao zahvalnost Vatikanu za sve što je učinio za Sarajevo i BiH u najtežim trenucima, o čemu svjedoči posjeta pape Ivana Pavla II Sarajevu 1997. godine. Također je istakao da je papa Franjo prilikom posjete Sarajevu 2015. dobio Ključ grada Sarajeva što je jedno od najvećih priznanja Grada Sarajeva.

Općina Cavallino (Lecce-Italija) izrazila je želju za bratimljenjem s Gradom Sarajevom ili jednom od gradskih općina Grada Sarajeva, te Grad Sarajevo je proslijedio Općini Novo Sarajevo na razmatranje prijedloga o bratimljenju između Općine Novo Sarajevo i Općine Cavallino.

Prijem članova Komisije za vijeća i unutarnje poslove Islamske skupštine IR Iran, 31.08.2017.

Gradonačelnik Sarajeva Abdulah Skaka, s predsjedavajućim Gradskog vijeća Igorom Gavrićem i zamjenicom predsjedavajućeg Edinom Gabelom upriličio je 31.08.2017. godine prijem za članove Komisije za vijeća i unutarnje poslove Islamske savjetodavne skupštine Islamske Republike Iran, koja je boravila u radnoj posjeti BiH.

Gradonačelnik Skaka ukazao je na veliko prijateljstvo između naroda BiH i IR Iran, na nezaboravan doprinos i pomoć te države tokom agresije na BiH, te izrazio želju da se odnosi između pobratimskih gradova, Sarajeva i Teherana, održavaju i unaprjeđuju.

Prijem ambasadora Republike Srbije u BiH, 12.09. 2017.

Gradonačelnik Sarajeva Abdulah Skaka primio je 12.09.2017. godine ambasadora Republike Srbije u BiH Stanimira Vukičevića.

Tokom susreta zaključeno je da je potrebno intenzivirati kontakte na nivou gradskih uprava dvaju glavnih gradova, posebno u kontekstu najavljenog projekta izgradnje autoceste Sarajevo - Beograd. Gradonačelnik Skaka je istakao da ima puno razloga i mogućnosti da se Sarajevo i Beograd jače povežu, ostvare punu saradnju i građanima pruže još više kulturnih i sportskih događaja, turističkih i privrednih manifestacija, te da uprave gradova razmijene znanja i iskustva u oblasti urbane infrastrukture i komunalnih servisa.

Sastanak s predstavnicima Ambasade NR Kine u BiH, 11.09.2017.

Savjetnik gradonačelnika za međunarodnu saradnju i EU integracije Ensar Eminović, i šefica Odjeljenja za međunarodnu saradnju i EU integracije Merima Hadžiabdić, primili su šeficu Političkog odjeljenja Ambasade NR Kine u BiH Gong Xiaodan, i Trećeg sekretara Ambasade Xu Gang.

Šefica političkog Odjela Ambasade Gong Xiaodan informirala je o namjeri Grada Tianjina da reaktivira saradnju između Sarajeva i Tianjina koji imaju uspostavljene pobratimske odnose od 1981. godine. S tim u vezi, Gong je zamolila da gradonačelnik Sarajeva uputi pozivno pismo za posjetu delegacije Grada Tianjina Sarajevu u novembru 2017, što je i realizirano.

Prijem šefa Delegacije EU u BiH i specijalnog predstavnika EU, 18.09.2017.

Gradonačelnik Sarajeva Abdulah Skaka sastao se s ambasadorom Larsom-Gunnarom Wigemarkom, šefom Delegacije EU u BiH i specijalnim predstavnikom EU.

Gradonačelnik Skaka je upoznao ambasadora Wigemarka s aktuelnim gradskim infrastrukturnim projektima, posebno s dinamikom radova na izgradnji Trebevičke žičare i pratećih objekata. Dogovoreno je da Grad Sarajevo kandidira ideje i projekte, koji bi se realizovali uz mogućnost finansijske podrške EU u BiH.

Sastanak s konzulicom Ambasade Republike Slovenije Andrejom Najžar, 17.10.2017.

Pomoćnica gradonačelnika za lokalnu samoupravu i razvoj grada Dragana Solaković sa saradnicima primila je predstavnike Ambasade Republike Slovenije, konzulicu Andreju Najžar i atašea Denisa Curanovića.

Tokom sastanka razgovarano je o projektu uređivanja korita rijeke Miljacke po uzoru na uređenje rijeke Ljubljanice koja teče kroz glavni grad Slovenije. Ideja o zajedničkoj saradnji na ovom projektu potekla je prilikom susreta gradonačelnika Sarajeva i Ljubljanice, Abdulaha Skake i Zorana Jankovića, u Ljubljani u martu 2017. godine, kada je razgovarano o unaprjeđenju odnosa između dva grada posebno u oblasti urbane infrastrukture, komunalnih servisa i javnog prevoza.

Konzulica Andreja Najžar kazala je da je Fakultet za arhitekturu Univerziteta u Ljubljani, na poziv Grada Ljubljanice, izrazio spremnost da sudjeluje u projektu uređenja korita rijeke Miljacke. Deset studenata će tokom ove školske godine pripremiti idejni projekat, a u martu 2018. godine posjetili bi Sarajevo, kako bi u saradnji s Gradom Sarajevom uskladili projekat. Studenti ljubljanskog Fakulteta za arhitekturu uspostavili su veze sa studentima Fakulteta za arhitekturu Univerziteta u Sarajevu.

Šef Odsjeka za komunalne poslove Amir Pandžo kazao je da je jedan od aktualnih projekata Grada Sarajeva projekat čišćenja rijeke Miljacke, da postoji ideja da se Miljacka načini čistom i plovnom rijekom.

Pomoćnica gradonačelnika Dragana Solaković informirat će Gradonačelnika o detaljima ovog sastanka, te nakon eventualnog pozitivnog stava Gradonačelnika koji je potreban kako bi se aktivnosti na projektu nastavile, Grad Sarajevo će obavijestiti Ambasadu Republike Slovenije, te će dostaviti i tehničke podatke i geodetske snimke Miljacke kojima raspolaže nadležna služba.

Prijem Visokog predstavnika Valentina Inzka, Vijećnica, 18.10.2017.

Gradonačelnik Sarajeva Abdulah Skaka primio je 18.10.2017. godine Visokog predstavnika za BiH Valentina Inzka, koga je upoznao s aktuelnim gradskim infrastrukturnim projektima, kao i vizijama budućeg razvoja grada Sarajeva, čije bogate potencijale još više treba iskoristiti i staviti u funkciju.

Posebno je bilo riječi o razvoju turizma, s obzirom na činjenicu da je Sarajevo posljednjih godina postalo top turistička destinacija.

Sagovornici su se složili da Sarajevo kao glavni grad treba da bude generator pozitivnih procesa koji bi se reflektovali na cijelu zemlju.

Nastupna posjeta ambasadora Kraljevine Holandije, Vijećnica, 03.11.2017.

Gradonačelnik Grada Sarajeva Abdulah Skaka primio je u nastupnu posjetu ambasadora Kraljevine Holandije Reinout Caspara Vosa, kojem je poželio uspješan mandat i dobrodošlicu u Sarajevo i BiH, te izrazio nadu za uspješnim nastavkom saradnje koju je Grad do sada imao s Ambasadorom Kraljevine Holandije.

Ambasador Vos je kazao da će Holandija nastaviti podupirati put približavanja BiH euroatlantskim integracijama, kako bi u što skorije vrijeme BiH postala punopravni član zajednice europskih država. Naglasio je značaj mira, te istakao podršku pomirenju kao jednom od glavnih zadataka.

Gradonačelnik Abdulah Skaka kazao je da Grad Sarajevo ulaže ogromne napore na pomirenju i održavanju balansa multietničnosti i multikulturalnosti.

Holandskog ambasadora je upoznao s kapitalnim projektima Grada Sarajeva, obnovom Vijećnice, izgradnjom Trebevičke žičare, održavanjem kulturnih, sportskih i ostalih značajnih manifestacija, održavanjem dobrih odnosa sa Zagrebom i Beogradom, te nastojanjima da se grad Sarajevo pozicionira kao mjesto okupljanja.

Gradonačelnik Sarajeva predložio je da u vrijeme otvaranja Trebevičke žičare, 6. aprila 2018. godine, u Sarajevo dođe jedan holandski novinar koji bi napravio reportažu o glavnom gradu BiH, te na taj način približio ljepote, život, običaje našeg grada stanovnicima Kraljevine Holandije.

Nastupna posjeta ambasadora Argentine za BiH Maximiliana Gabriela Gregoria Cernadasa, Vijećnica, Vijećnica, 21.11.2017.

Gradonačelnik Sarajeva Abdulah Skaka sa savjetnikom za međunarodnu saradnju i EU integracije Ensarom Eminovićem, primio je 21.11.2017. godine u nastupnu posjetu ambasadora Argentine za BiH, sa sjedištem u Budimpešti, Maximiliana Gabriela Gregoria Cernadasa.

V. OSTALE AKTIVNOSTI NA PLANU MEĐUNARODNE SARADNJE

Službeni posjet predsjednika Crne Gore Bosni i Hercegovini, 05. - 07.03.2017.

Član Predsjedništva BiH Bakir Izetbegović i gradonačelnik Sarajeva Abdulah Skaka 07.03.2017. godine bili su domaćini u šetnji starim dijelom grada Sarajeva predsjedniku Crne Gore Filipu Vujanoviću, koji je boravio u dvodnevnoj zvaničnoj posjeti BiH.

Projekat „Obuka uposlenika u oblasti upravljanja infrastrukturnim projektima u Federaciji BiH“, Bratislava (R Slovačka), 02.- 07.04.2017.

U okviru projekta „Obuka uposlenika u oblasti upravljanja infrastrukturnim projektima u Federaciji BiH“, Agencija za državnu službu Federacije BiH (ADS FBIH), u saradnji s Mrežom škola i instituta za javnu upravu u Centralnoj i Istočnoj Europi (NiSPAcee) organizovala je Obuku za uposlenike jedinica lokalne samouprave u oblasti upravljanja infrastrukturnim projektima u skladu s EU direktivama i FIDIC procedurama, te studijsku posjetu Bratislavi.

Broj učesnika studijske posjete bio je ograničen na ukupno 25 učesnika s područja Federacije BiH, a eksperti su dolazili iz oblasti građevine i javnih nabavki.

U ime Grada Sarajeva, šefica Odjeljenja za pravne poslove Mila Eminović Rizvanović učestvovala je u obuci i studijskom posjetu Bratislavi.

Obuka je trajala od 02. do 07.04.2017. godine i sastojala se od predavanja, vježbi i posjeta resornim ministarstvima R Slovačke iz oblasti vodoprivrede i zaštite okoliša, njihovim Uredima koji rade na EU projektima, visokosofisticiranim prečišćaćima otpadnih voda, a čija izgradnja se u cijelosti finansirala sredstvima iz fondova i razvojnih banaka, a što je stvorilo i obavezu subjektima koji su dobili sredstva da provedu EU nabavku i s odabranim izvođačem radova ugovore primjenu FIDIC pravila. Pored toga, organizovana je i posjeta administraciji Općine Modra prilikom koje su se učesnici upoznali sa sistemom vodozaštite ove jedinice lokalne samouprave.

Nastavak obuke je planiran za oktobar 2017. u Sarajevu, a na kraju obuke, učesnici će zajedno s ekspertima izraditi priručnike koji će se dalje distribuirati jedinicama lokalne samouprave, a učesnici će se osposobiti i da budu praktičari, kao i treneri iz ove oblasti kako u svom kolektivu tako i za ostale službenike, a putem ADS FBIH.

Posjeta premijera Republike Slovenije Mire Cerara, Sarajevo, 10.04.2017.

Zamjenik gradonačelnika Milan Trivić, u ime Grada Sarajeva poželio je dobrodošlicu premijeru R Slovenije Miri Ceraru, koji je zajedno s predsjedavajućim Vijeća ministara BiH Denisom Zvizdićem obišao sarajevsku Vijećnicu.

Projekat Grada Sarajeva i NVO IPIL-IPIL no KAI iz Tokija, 12.04.2017.

Grad Sarajevo u saradnji s nevladinom organizacijom IPIL-IPIL no KAI iz Tokija realizira projekte *Trešnje za Sarajevo* i *Takmičenje u crtanju učenika osnovnih škola*.

Ove godine Grad Sarajevo uputio je pozive na adrese deset osnovnih škola na području grada Sarajeva za učešće na likovnom takmičenju. U tu svrhu školama je dostavljen reciklirani papir, donacija nevladine organizacije IPIL-IPIL no KAI.

Svoje radove na temu *Budućnost* dostavilo je pet osnovnih škola i to Grbavica II, Vladislav Skarić, Alija Nametak, Safvet – beg Bašagić, Osman Nakaš i Edhem Mulabdić.

Izbor najboljih crteža organiziran je 12.04.2017. godine u Ambasadi Japana u Sarajevu, kojem je prisustvovala i pomoćnica gradonačelnika za obrazovanje, kulturu i sport Amina Deljković.

Zatim je u Gradskoj upravi održan sastanak pomoćnice gradonačelnika za obrazovanje, kulturu i sport Amine Deljković i pomoćnika za komunalne poslove Hamde Karića s predstavnicima Ambasade Japana, organizacije IPIL-IPIL no KAI, te KJKP Park, koji brinu o doniranim sadnicama japanskih trešanja.

Predstavnici IPIL-IPIL no KAI posjetili su osnovne škole Safvet – beg Bašagić i Grbavica II, čiji su učenici osvojili nagrade u spomenutom likovnom takmičenju, te su im tom prilikom uručene zahvalnice, nagrade i simbolični pokloni.

Posjeta Njenog Kraljevskog Veličanstva princeze od Tajlanda, Sarajevo, 20.04.2017.

Gradonačelnik Sarajeva Abdulah Skaka sa zamjenikom Milanom Trivićem upriličio je prijem Njenom Kraljevskom Veličanstvu princezi Maha Chakri Sirindhorn od Tajlanda, kojoj je ovo bila prva posjeta Sarajevu i BiH.

Nakon prijema, princeza Maha Chakri Sirindhorn obišla je Vijećnicu. U Muzeju Vijećnice pogledala je dvije stalne izložbene postavke, posvećene obnovi i rekonstrukciji Vijećnice započete 1996. godine, te životu u Sarajevu u posljednjih sto godina.

Na kraju posjete, princeza Maha Chakri Sirindhorn je u knjizi utisaka čestitala rođendan Vijećnici koja je tog dana obilježavala 121. godinu od svog prvog otvorenja.

Prijem zamjenika ministra kulture Republike Italije, 20.04.2017.

Zamjenik gradonačelnika Milan Trivić primio je zamjenika ministra za kulturu i turizam Republike Italije Antima Cesara i ambasadora Republike Italije u BiH, 20.04.2017. godine.

Tokom susreta razgovaralo se o nastavku realizacije projekta Ars Aevi. Zamjenik gradonačelnika Milan Trivić istakao je da su naredne četiri godine ključne za opstanak, odnosno završetak projekta Ars Aevi, koji bi trebao biti jedan od prioriteta tokom mandata aktuelne gradske administracije.

Zamjenik ministra za kulturu Italije Cesaro predložio je da Grad Sarajevo zajedno s državnim predstavnicima vlasti - Vijećem ministara BiH, Ministarstvom civilnih poslova BiH,

Ministarstvom kulture i sporta KS, uputi prijedlog pisma za pomoć u finansiranju projekta svim nivoima vlasti R Italije.

Prijem predstavnika Saveza evanđeoskih crkava Švicarske, 12.05.2017.

Zamjenik gradonačelnika Milan Trivić primio je 12.05.2017. godine predsjednika Saveza evanđeoskih crkava Švicarske, velečasnog dr. Gottfrieda Lochera i sekretara Švicarskog vijeća religija, velečasnog dr. Abela Manoukiana.

Velečasni Locher je kazao da se nalaze u posjeti Sarajevu na poziv reisu-l-uleme Huseina ef. Kavazovića s kojim su se susreli prilikom njegove posjete Švicarskoj u maju prošle godine. Također, istakao želju za nastavkom razgovora o jačanju saradnje između muslimana i hrišćana kroz buduće partnerske veze Švicarske protestantske evangelističke zajednice s Islamskom zajednicom u Bosni i Hercegovini.

Svečano otvorenje prostorija Turske agencije za međunarodnu saradnju i koordinaciju - TIKa, 12.05.2017.

Svečanom otvaranju novih prostorija Turske agencije za međunarodnu saradnju i koordinaciju - TIKa u Sarajevu, održanom 12.05.2017. godine, prisustvovao je gradonačelnik Sarajeva Abdulah Skaka koji je čestitao i zahvalio na više od 800 različitih projekata realiziranih u posljednje 22 godine na području Bosne i Hercegovine.

Nakon presjecanja vrpce, gradonačelnik Skaka je zajedno sa zamjenikom premijera Republike Turske Veysijem Kaynakom, obišao nove prostorije TIKa-e. Ceremoniji su također prisustvovali i zastupnik turskog parlamenta Hakan Cavuşoğlu, ambasador Turske u BiH Haldun Koç, zamjenik predsjednika TIKa-e Birol Cetin, direktor TIKa-e za Balkan i Jugoistočnu Europu Mahmut Cevik, koordinator TIKa za Sarajevo Ömer Faruk Alımcı, te mnogobrojni gosti.

Prijem zamjenika ministra ekonomije Azerbejdžana, 22.05.2017.

Gradonačelnik Sarajeva Abdulah Skaka primio je 22.05.2017. godine zamjenika ministra ekonomije Azerbejdžana Sahiba Mammadova, koji je boravio u Sarajevu povodom održavanja 8. Sarajevo Business Forum.

Na prijemu je razgovarano o mogućnostima bilateralne saradnje, s posebnim akcentom na saradnju pobratimskih gradova Bakua i Sarajeva, koju je potrebno intenzivirati.

Prijem brigadira turske jedinice EUFOR-a, 30.05.2017.

Gradonačelnik Sarajeva Abdulah Skaka primio je brigadira turskog kontingenta EUFOR-a, g. Tayfunu Çelika koji je upoznao gradonačelnika o nastupu turskog vojnog orkestra Mehter 28. juna na Baščaršiji.

Gradonačelnik Skaka je upoznao brigadira Çelika s aktualnim projektima Grada Sarajeva, posebno se osvrnuvši na projekt park Dariva. Brigadir Çelik je pokazao interes za ovaj projekt i zatražio detaljnije informacije o projektu, te izrazio želju da posjeti lokalitet Darive. Gradonačelnik Skaka je istakao da Bosna i Hercegovina i Turska imaju jako dobre prijateljske odnose koje je potrebno dodatno osnažiti kroz konkretnu saradnju.

Prijem koordinatora Turske agencije za saradnju i koordinaciju, 30.05. 2017.

Gradonačelnik Sarajeva Abdulah Skaka primio je koordinatora Turske agencije za saradnju i koordinaciju (TIKA) Ömera Faruka Alimcija, te tom prilikom izrazio zahvalnost TIKA-i na realizaciji brojnih projekata na području BiH. Također, zamolio je za podršku ove Agencije u projektima koje Grad Sarajevo namjerava realizirati s gradovima Republike Turske.

Obzirom da je Grad Istanbul obećao pružiti pomoć za obnovu prostora medicinske asocijacije BIMA u Sarajevu, dogovoreno je da TIKA osigura prevod projekta na turski jezik, što je prihvaćeno.

Dogovoreno je da se naredni sastanak održi za mjesec dana u prostorijama TIKA-e kada će biti prezentirani projekti Grada Sarajeva za zajedničku realizaciju s gradovima Republike Turske.

Prijem italijanskog umjetnika Michelangela Pistoletta, 01.06.2017.

Ministar civilnih poslova BiH Adil Osmanović, gradonačelnik Sarajeva Abdulah Skaka i zamjenik gradonačelnika Ivica Šarić primili su Michelangela Pistoletta, italijanskog umjetnika i jednog od najvećih savremenih stvaralaca. Ministar civilnih poslova BiH Adil Osmanović je istakao kako je Pistoletto prvi internacionalni umjetnik koji je poklonio svoje djelo za Kolekciju savremene umjetnosti Ars Aevi, te na taj način pokrenuo njenu međunarodnu promociju.

Na inicijativu Ambasade Republike Italije u BiH, a povodom obilježavanja Dana Republike Italije, Pistoletto je 02.06.2017. godine predstavio svoje djelo Terzo Paradiso (Treći raj) u depou Ars Aevija.

U završnici svog obraćanja Pistoletto je uručio dokument gradonačelniku Grada Sarajeva, Ambasadi Republike Italije i Projektu Ars Aevi kojim se potvrđuje njegova odluka da se umjetničko djelo Multikonfesionale E Laico - Multikonfesionalna kocka daruje Gradu Sarajevu, koja predstavlja treću fazu razvoja kolekcije savremene umjetnosti Ars Aevija, za Specijalni dio Kolekcije pod nazivom: Umjetnost svijeta u Sarajevu.

Prijem predsjednika Međunarodnog krivičnog suda za bivšu Jugoslaviju, 19.06.2017.

Gradonačelnik Sarajeva Abdulah Skaka primio je 19.06.2017. godine predsjednika Međunarodnog krivičnog suda za bivšu Jugoslaviju (MKSJ) Carmela Agiusa koji je boravio u Sarajevu povodom održavanja Konferencije „Dijalozi o naslijeđu MKSJ“ od 22. do 24.06.2017. godine.

Gradonačelnik Skaka je upoznao predsjednika Agiusa s aktivnostima koje Grad Sarajevo vodi u cilju uspostavljanja Informativnog centra Sarajevo, na osnovu potpisanog Memoranduma u novembru 2016. godine.

Uspostavljanjem ovog centra, Grad Sarajevo želi dati konkretan doprinos suočavanju s prošlošću, izgradnji mira i pomirenja. Ovaj centar bi javnosti trebao da pruži ažuriran, direktan i bezbjedan elektronski pristup javno dostupnim spisima MKSJ-a i arhivskom materijalu sadržanom u on-line bazama podataka MKSJ-a. Centar će, istovremeno, imati edukativnu, istraživačku, muzejsku, arhivsku i izdavačku funkciju.

Prijem bivšeg predsjednika Međunarodnog krivičnog suda za bivšu Jugoslaviju, 21.06.2017.

Gradonačelnik Sarajeva Abdulah Skaka primio je bivšeg predsjednika Međunarodnog krivičnog suda za bivšu Jugoslaviju (MKSJ) i osobu zaduženu za koordinaciju uspostavljanja Informativnog centra u Sarajevu, sudiju Fausta Pocara, u Vijećnici, 21.06.2017. godine.

Gradonačelnik Skaka upoznao je sudiju Pocara s aktivnostima koje Grad Sarajevo trenutno vodi u cilju uspostavljanja Informativnog centra Sarajevo. Sudija Pocar izrazio je nadu da će Informativni centar Sarajevo biti otvoren do kraja 2017. godine.

Prijem komandanta Snaga EU (EUFOR) u BiH, 05.07 2017.

Gradonačelnik Sarajeva Abdulah Skaka primio je u nastupnu posjetu komandanta EUFOR-a u BiH, general-majora Antona Waldnera.

Tokom prijema istaknuto je da će EUFOR u skladu s ciljevima svoje misije u BiH i dalje aktivno doprinositi stabilnosti i sigurnosti u regionu.

Prijem komandanta NATO štaba, 24.07.2017.

Gradonačelnik Sarajeva Abdulah Skaka primio je u nastupnu posjetu komandanta NATO Štaba u Sarajevu, brigadnog generala Roberta Hustona, kojem je izrazio dobrodošlicu i zaželio uspješnu misiju u BiH.

Komandant Huston naglasio je da će NATO u skladu sa ciljevima svoje misije u BiH, i dalje aktivno doprinositi stabilnosti i sigurnosti, kao i poboljšanju kvalitete života građana.

Gradonačelnik Skaka izrazio je želju da BiH ostvari napredak na putu ka članstvo u NATO Savezu u vrijeme mandata komandanta Hustona.

Posjeta delegacije Grada Sarajeva Vatikanu, 20.09.2017.

Delegacija Grada Sarajeva, na čelu s gradonačelnikom Abdulahom Skakom, boravila je u posjeti Vatikanu. U delegaciji su pored gradonačelnika bili predsjedavajući Gradskog vijeća Igor Gavrić, zamjenici gradonačelnika Ivica Šarić i Milan Trivić, te bivši gradonačelnik Sarajeva Ivo Komšić. Nakon održane Opće audijencije, članovi delegacije su se susreli s papom Franjom, te zahvalili što podržava multietnički način života u Sarajevu i BiH.

Prijem učenika i nastavnika O.Š. „Grbavica I“ i „Fatima Gunić“, 12.10.2017.

Gradonačelnik Sarajeva Abdulah Skaka upriličio prijem i uručio novčane nagrade učenicima i nastavnicima O.Š. „Grbavica I“ i „Fatima Gunić“, čiji nagrađeni likovni radovi krase urede Gradske uprave prijateljskog grada Hirošime i Ambasade Japana u Sarajevu. Prijemu je prisustvovala i pomoćnica gradonačelnika za obrazovanje, kulturu i sport sa saradnicima Amina Deljković.

Nagrađeni likovni radovi šest učenika ovih dviju sarajevskih osnovnih škola uručeni su na ceremoniji primopredaje „Kamena mira“ iz Hirošime Gradu Sarajevu, održanoj u Zemaljskom muzeju u junu 2017. godine.

Zatvaranje izložbe “Exodus“ umjetnika Safeta Zeca, Venecija, 28.11.2017.

Izložba “Exodus“ istaknutog bh. umjetnika Safeta Zeca, koja je početkom maja otvorena u venecijanskoj crkvi “Santa Maria della Pieta“, svečano je zatvorena 28.11.2017. godine, uz prisustvo delegacije Grada Sarajeva na čelu s gradonačelnikom Abdulahom Skakom.

Izložba inspirisana izbjegličkom krizom, emotivni je slikarski apel Safeta Zeca za prestanak ratovanja i ubijanja.

U zvaničnom obraćanju gradonačelnik Skaka je, između ostalog, izrazio spremnost da se omogući da izložba “Exodus” nađe svoje konačno odredište u Sarajevu.

Maria Laura Faccini, umjetnička direktorica Instituta Santa Maria Della Pieta istakla je posebno zadovoljstvo zbog saradnje s maestrom Zecom zbog ujedinjenosti u ideji da se hrabro stane pred najveće zlo 21. vijeka.

Safet Zec je izrazio želju da izložba bude postavljena u BiH i da se u Sarajevu “osposobi” galerijski prostor koji bi u svoje okrilje primio sva velika umjetnička djela.

Ceremoniji zatvaranja izložbe pridružili su se i svjetski poznati virtuoz na lutnji Edin Karamazov, i operni pjevač i zamjenik gradonačelnika Ivica Šarić, koji su zajedno izveli repertoar koji je sadržavao djela Vivaldija i Schuberta, te Alekse Šantića.

Diplomatski zimski bazar, Sarajevo, 09.12.2017.

Diplomatski zimski bazaar, održan u dvorani “Mirza Delibašić” 08.12.2017. godine, ove godine podržao je Grad Sarajevo i gradonačelnik Abdulah Skaka.

Ovu plemenitu manifestaciju organizuju supruge ambasadora i diplomatskih predstavnika koji djeluju u BiH. Prikupljeni prihod od kupovine ulaznica i proizvoda koji su izloženi na bazaru, donira se organizacijama koje se brinu o djeci s poteškoćama širom naše zemlje.

Bazar je i ove godine, na štandovima brojnih izlagača, ponudio brojne sadržaje od hrane do suvenira iz cijelog svijeta.

Na štandu Grada Sarajeva, Majda Skaka, supruga gradonačelnika Abdulaha Skake, ponudila je tradicionalne bh. proizvode, suvenire, literaturu, razglednice Sarajeva, sve sa ciljem da i naš grad doprinese da se na Diplomatskom zimskom bazaru skupi rekordna suma novca za djecu iz cijele Bosne i Hercegovine.

Sastanak s Edinom Jahićem, stručnjakom za EU fondove, 13.12.2017.

Predstavnici Grada Sarajeva održali su sastanak sa stručnjakom za EU fondove Edinom Jahićem u cilju definiranja moguće saradnje u apliciranju Grada Sarajeva za finansiranje projekata iz sredstava EU fondova.

Razgovarano je o iskustvima u ovoj oblasti, pri čemu su pomoćnice gradonačelnika Dragana Solaković i Amina Deljković, ukratko prezentirale dosadašnje projekte sa kojima je Grad Sarajevo aplicirao (npr. projekat „Muzejska priča“ u okviru programa prekogranične saradnje BiH-Srbija), te su razmijenjena mišljenja u vezi potencijalnog delegiranja projekta ugradnje solarnih panela na Olimpijskom bazenu „Otoka“.

Edin Jahić je predložio direktno apliciranje s konkretnim prijedlogom prema Delegaciji EU u BiH, odnosno Europskoj komisiji, te je ponudio svoju pomoć u tom procesu.

Savjetnica gradonačelnika Erna Čolić predložila je projekat iz kategorije zaštite okoliša „Čista rijeka Miljacka“ čija je procijenjena vrijednost 90 miliona KM. U projekat bi bilo uključeno 11 zainteresiranih strana, dva entiteta i neke općine, a Grad Sarajevo bi bio lider. Projekat bi se realizirao u četiri faze, s tim što bi Grad Sarajevo u nekim dijelovima revidirao postojeći projekat i podijelio ga na lotove.

Pomoćnica gradonačelnika Amina Deljković ukazala je na potrebu edukacije mladih ljudi u Gradskoj upravi za uspješno pisanje projekata i apliciranje na sredstava iz EU fondova.

Rođendanski koncert Crnogorskog simfonijskog orkestra, Podgorica, 14.-15.12.2017.

Na poziv Muzičkog centra Crne Gore, zamjenik gradonačelnika Ivica Šarić prisustvovao je proslavi jubileja deset godina Crnogorskog simfonijskog orkestra i svečanosti na kojoj je bila promovirana Monografija i CD Crnogorskog simfonijskog orkestra, u Podgorici 14. i 15.12.2017. godine.

Prijem nastavnika i učenika Osnovne muzičke škole „Lovro pl. Matačić“ iz Omiša, Vijećnica, 15.12.2017.

Povodom organizacije zajedničkog koncerta učenika Osnovne muzičke škole „Lovro pl. Matačić“ i Osnovne muzičke i baletske škole „Novo Sarajevo“ u Domu Oružanih snaga BiH 16.12.2017. godine, nastavnike i učenike omiške Osnovne glazbene škole primila je pomoćnica gradonačelnika za obrazovanje, kulturu, sport i mlade Amina Deljković, u Vijećnici 15.12.2017. godine.

Pomoćnica gradonačelnika uputila je gostima riječi dobrodošlice u glavni grad Bosne i Hercegovine, kao i podrške njegovanju prijateljskih odnosa između dvije muzičke škole.

Svečana ceremonija zatvaranja Međunarodnog krivičnog suda za bivšu Jugoslaviju (MKSJ), Hag (Kraljevina Holandija), 20.-22.12.2017.

Povodom svečane ceremonije zatvaranja Međunarodnog krivičnog suda za bivšu Jugoslaviju (MKSJ), delegacija Grada Sarajeva boravila je u Hagu (Kraljevina Holandija) od 20. do 22.12.2017. godine.

Delegaciju Grada Sarajeva koju je predvodio gradonačelnik Abdulah Skaka, činili su bivši gradonačelnik Sarajeva i predsjednik Savjeta gradonačelnika za Informativni centar MKSJ Ivo Komšić, savjetnik gradonačelnika za međunarodnu saradnju i EU integracije Ensar Eminović i šefica Odsjeka za Informativni centar MKSJ Mila Eminović.

Gradonačelnik Abdulah Skaka susreo se u Hagu na odvojenim sastancima sa sucima Međunarodnog krivičnog suda za bivšu Jugoslaviju Carmelom Agiusom i Theodorom Meronom, predsjednikom Međunarodnog rezidualnog mehanizma za međunarodne krivične sudove IRMCT.

Razgovarano je o aktivnostima vezanim za funkcioniranje Informativnog centra Haškog suda u Sarajevu. Gradonačelnik Skaka je ukazao na povijesni značaj i ulogu Haškog tribunala, ističući da je Grad Sarajevo do sada učinio niz koraka na pripremi za realizaciju projekta Informativnog centra koji je od suštinske važnosti za cijelu regiju i proces pomirenja.

U skladu s Memorandumom o razumijevanju između Tribunala u Hagu i Grada Sarajeva koji je potpisan 29.11.2016. godine, uspostavljen je Informativni centar.

Centar će biti smješten u Vijećnici i podržan odgovarajućom opremom. Mandat Informativnog centra Sarajevo je da pruži javnosti ažuran, izravan i siguran elektronski pristup svim javno dostupnim spisima Tribunala i arhivskom materijalu sadržanom u online bazama podataka MKSJ. Ova institucija će imati edukativnu, istraživačku, muzejsku, arhivsku i izdavačku funkciju.

Dogovoreno je da Haški tribunal Informativnom centru Haškog suda u Sarajevu pokloni cijelu sudnicu u kojoj se svih ovih godina sudilo ratnim zločincima, koja će biti prenesena u Vijećnicu gdje će svi posjetitelji moći da detaljnije pogledaju u kakvoj je sudnici suđeno za najteže zločine za rat u BiH.

Sastancima je prisustvovala i ambasadorica BiH u Holandiji Mirsada Čolaković.

VI. INFORMACIJA O AKTIVNOSTIMA GRADA SARAJEVA U OKVIRU MEĐUNARODNIH ASOCIJACIJA ČIJI JE ČLAN

Na osnovu člana 26. stav 1. tačka 2. i člana 87. Statuta Grada Sarajeva ("Službene novine Kantona Sarajevo", broj 34/08 - Prečišćeni tekst) Grad Sarajevo može pristupiti međunarodnim udruženjima lokalnih zajednica i saradivati s odgovarajućim lokalnim jedinicama drugih država, u skladu sa zakonom.

Odluku o pristupanju udruženjima, odnosno ostvarivanju saradnje iz navedenog stava donosi Gradsko vijeće.

Grad Sarajevo je član jedanaest međunarodnih asocijacija, od čega obavezu plaćanja članarina ima prema osam asocijacija, u iznosu od cca. 30.000,00 KM godišnje:

r/b	Asocijacija	Godina pristupanja	Godišnja članarina
1.	Unija glavnih gradova Centralne i Jugoistočne Europe (UCSEEC)	2001.	-
2.	Mreža zdravih gradova Svjetske zdravstvene organizacije (WHO)	2001.	3.500,00\$
3.	Mreža balkanskih gradova (BALCINET)	2002.	-
4.	Europska koalicija gradova protiv rasizma (ECCAR)	2004.	-
5.	Mreža „Gradonačelnici za mir“ (Mayors for Peace)	2004.	4.500,00¥
6.	Međunarodna asocijacija gradovi glasnici mira (IAPMC)	2005.	500,00€
7.	Mreža europskih gradova EUROCITIES	2005.	4.260,00€
8.	Svjetska unija olimpijskih gradova (UMVO)	2009.	5.000,00€
9.	Liga historijskih gradova (LHC)	2009.	100,00\$
10.	Europski gradovi i regije za kulturu LIKE	2012.	1.060,00€
11.	Mreža mediteranskih gradova <i>MedCities</i>	2016.	1.000,00€

MREŽA „GRADONAČELNICI ZA MIR“ (MAYORS FOR PEACE)

Otvoreno pismo „Gradonačelnika za mir“, 14.03.2017. godine

Prvi krug pregovora UN-a o sporazumu o zabrani nuklearnog oružja počeo je 27.03.2017. godine u sjedištu UN-a u Njujorku, u uvjerenju da je pravna zabrana nuklearnog oružja ključni korak prema ostvarenju svijeta bez nuklearnog oružja.

Kako bi izrazili snažnu podršku ovoj historijskoj inicijativi gradovi članovi „Gradonačelnika za mir“, među kojima i Grad Sarajevo, uputili su 14.03.2017. godine *otvoreno pismo* u kojem se između ostalog apelira na sve države, uključujući i one koje posjeduju nuklearno oružje i njihove saveznike, da konstruktivno sudjeluju u pregovorima koji će dovesti do pravne zabrane nuklearnog oružja.

Otvoreno pismo poslano je svim zemljama članicama UN-a, predsjedniku Konferencije, glavnom sekretaru UN-a, podsekretaru UN-a, Visokom predstavniku za poslove razoružanja i direktoru Ureda UN-a u Ženevi.

Nastavak izvršnog članstva Grada Sarajeva u „Gradonačelnicima za mir“, 29.05.2017.

Grad Sarajevo je na prijedlog gradonačelnika Hirošime i predsjednika „Gradonačelnika za mir“ potpisao 10.07.2014. godine saglasnost da će djelovati kao *Vodeći grad „Gradonačelnika za mir“ u BiH.*

Uz imenovanje *Izvršnim članom „Gradonačelnika za mir“*, Grad Sarajevo je u junu 2015. godine, od strane Mreže potvrđen kao *Vodeći grad „Gradonačelnika za mir“ u BiH*, koji će promovirati proaktivne i nezavisne aktivnosti prilagođene regionu.

Ovim je Grad Sarajevo, u cilju ukidanja nuklearnog oružja do 2020., preuzeo određene odgovornosti i obaveze definisane u *Mjerama za jačanje sistema rukovođenja „Gradonačelnika za mir“*, kao što su uspostavljanje odgovarajućeg sistema za jačanje mreže među bh. gradovima članovima, proširenje članstva, te dodatno unaprjeđenje aktivnosti „Gradonačelnika za mir“ u BiH.

„Gradonačelnici za mir“ pozvali su Grad Sarajevo da kao izvršni član nastavi s podrškom i tokom mandatnog perioda od augusta 2017. do augusta 2020. godine, što je Grad Sarajevo i prihvatio potpisivanjem saglasnosti 29.05.2017. godine.

Podrška izjavi povodom terorističkog napada u Mančesteru i Londonu, 31.05.2017.

Sekretarijat „Gradonačelnika za mir“ uputio je gradovima izvršnim članovima Mreže, nacrt izjave povodom terorističkog napada u Mančesteru, koji je pripremio Ured Gradonačelnika za mir za Veliku Britaniju i Irsku.

Gradovi su zamoljeni da pruže podršku izjavi ili da dostave individualne izjave koje će Sekretarijat „Gradonačelnika za mir“ za Veliku Britaniju i Irsku proslijediti uredu gradonačelnika Mančestera.

S tim u vezi, gradonačelnik Sarajeva Abdulah Skaka uputio je dopis gradonačelniku Mančestera Eddyju Newmanu, u kojem je, izrazivši sućut porodicama stradalih građana tog grada, najstrože osudio terorističke napade i istakao da će Grad Sarajevo nastaviti djelovati u okviru „Gradonačelnika za mir“ na promociji mira i razumijevanja u svijetu.

Također, Grad Sarajevo je 06.06.2017. godine osudio teroristički napad koji se desio i u Londonu.

Ceremonija otkrivanja "Kamena za mir", Sarajevo, 21.06.2017.

Gradonačelnik Sarajeva Abdulah Skaka i predsjednik Asocijacije „Kamen za mir iz Hirošime“ Michio Umemoto, na svečanoj ceremoniji upriličenoj u Botaničkoj bašti Zemaljskog muzeja BiH 21.06.2017. godine, otkrili su kamen mira koji je Gradu Sarajevu darovao Grad Hirošima.

Ovom prilikom gradonačelnik Skaka je izrazio zadovoljstvo što je Sarajevo postalo 111. grad Europe i svijeta koji je preuzeo ovaj kamen, čime se nastavlja promocija mirovne misije Asocijacije iz Hirošime koja traje već 26 godina.

Kamen iz Hirošime jedan je od 200 kamenih fragmenata izvađenih ispod tramvajskih šina kod Aioi mosta, koji se nalazio samo 200m sjeverno od mjesta gdje je eksplodirala atomska bomba, koja je bačena na ovaj japanski grad 06.08.1945. godine. U svaku ploču je uklesan lik japanske božice milosti Kannon i riječi *Iz Hirošime*, a bilo je potrebno 10.000,00 ljudi i sedam godina rada da bi se isklesali svi kameni blokovi.

Prema riječima predsjednika Asocijacije, ovaj kamen trebao bi da opominje na svu tragičnost ratnih razaranja kroz koja su prošla Sarajevo i Hirošima, ali i da ukazuju na potrebu stalne borbe za mir, harmoniju i međusobno uvažavanje. Iskazao je uvjerenje da će se spona između zemalja koje posjeduju ovaj kamen širiti i postajati čvršće.

Ambasador Japana u BiH Kazuya Ogawa podsjetio je na potpisanu Deklaraciju o razmjeni iskustava i saradnji između Sarajeva i Hirošime, kao i ulogu Grada Sarajeva u „Gradonačelnicima za mir“.

Svečana ceremonija u Zemaljskom muzeju završena je uručivanjem likovnih radova sarajevskih osnovaca prijateljima iz Hirošime, te nastupom Dječijeg hora „Palčići“.

Sekretarijat *Gradonačelnika za mir* objavio je vijest o ovoj ceremoniji u letku za juli mjesec.

Drvo ginko – simbol mira

U okviru obilježavanja 100. godišnjice početka Prvog svjetskog rata, gradonačelnik Sarajeva i generalni sekretar “Gradonačelnika za mir”, zasadili su izdanak drveta ginko (koje je preživjelo atomsku bombu bačenu na Hirošimu), kao simbol mira, dugovječnosti, jedinstva suprotnosti i nosioca nade, u Parku prijateljstva 28.06.2014. godine.

(Nakon ceremonije sadnica je prebačena u rasadnik Neđarići KJKP Park d.o.o. Sarajevo na čuvanje - uzgoj i njegu).

Nakon što je Sekretarijat “Gradonačelnika za mir” mailom od 22.09.2017. godine izrazio interesovanje o stanju drveta, Odjeljenje za međunarodnu saradnju i europske integracije kontaktiralo je rasadnik Neđarići, te informaciju o trenutnom stanju sadnice dostavilo Sekretarijatu.

MEĐUNARODNA ASOCIJACIJA GRADOVI GLASNICI MIRA (IAPMC)

28. Generalna skupština Međunarodne asocijacije “Gradovi glasnici mira” (IAPMC), Orestiada (Republika Grčka), 06. - 10.09.2017.

Redovna sjednica Izvršnog odbora i 28. Generalna skupština Međunarodne asocijacije “Gradovi glasnici mira” (IAPMC), održana je u Orestiadi (Republika Grčka), od 06. do 10.09.2017. godine.

Sjednici je prisustvovalo osam delegacija gradova iz šest zemalja svijeta, a u ime Grada Sarajeva učestvovala je šefica Odjeljenja za stručne poslove u Službi Gradskog vijeća Mirjana Đanović Stanić.

Na Skupštini je, pored ostalog, prezentiran i jednoglasno prihvaćen prijem Grada Rostocka u

članstvo IAPMC; usvojen Izvještaj generalnog sekretara IAPMC s elementima razmatranim na sjednici Izvršnog odbora; usvojen izvještaj predsjednika IAPMC s naglaskom da je Asocijacija sudjelovala u radu Generalne skupštine UN-a kada je usvojen tekst sporazuma o nuklearnom razoružanju.

Od budućih aktivnosti IAPMC izdvojena je kandidatura Asocijacije za članstvo u Izvršnom odboru Svjetske federacije UN udruženja koja je prošle godine obilježila 70 godina postojanja i čija je IAPMC članica od osnivanja.

Domaćinstvo za sjednicu Izvršnog odbora IAPMC u 2018. godini kandidirao je Abiđan (Obala Slonovače), a za 29. sjednicu Generalne skupštine IAPMC Volgograd (Ruska Federacija). Jubilarna 30. Skupština Asocijacije bi se trebala održati u Sarajevu 2019. godine.

Na Skupštini je prezentiran i nacrt IAPMC *Orestiada izjave*, koji je prihvaćen i koji će biti distribuiran gradovima na potvrđivanje.

SVJETSKA UNIJA OLIMPIJSKIH GRADOVA (UMVO)

Godišnji sastanak Unije olimpijskih gradova (UMVO) i Pametni gradovi i Samit sporta, Montreal (Kanada), 02. - 04.10.2017.

Na poziv predsjednika Unije olimpijskih gradova i gradonačelnika Lozane Grégoire Junoda, gradonačelnik Sarajeva Abdulah Skaka prisustvovao je Godišnjem sastanku Svjetske unije olimpijskih gradova (UMVO) i Samitu pametnih gradova i sporta, održanom u Montrealu (Kanada) 02. do 04.10.2017. godine.

Ovogodišnji sastanak okupio je predstavnike svjetskih olimpijskih gradova koji su učestvovali u radu brojnih interaktivnih sesija. Ovom prilikom izabrani su gradovi članovi Izvršnog odbora za predstojeći četverogodišnji mandat, dat je osvrt na aktivnosti tokom 2017. godine, te su razmatrane programske aktivnosti za 2018. godine.

Naredni Godišnji sastanak održat će se u Lozani (Švicarska) 29.10.2018. godine.

Na poziv gradonačelnika Lake Placida (SAD), domaćina ZOI 1932. godine i 1980. godine, učesnici Godišnjeg sastanka UMVO posjetili su taj grad 04. do 06.10.2017. godine, te se upoznali s njegovim olimpijskim nasljeđem.

EUROPSKA KOALICIJA GRADOVA PROTIV RASIZMA (ECCAR)

Europska koalicija gradova protiv rasizma (ECCAR) odlučila je da temu sporta u borbi protiv rasizma i diskriminacije postavi kao prioritet za 2018. godinu.

S tim u vezi, krajem 2017. godine pokrenula je međunarodni javni poziv za podnošenje prijedloga projekata koji je otvoren za sportske klubove, sportska udruženja ili mreže sa sjedištem u gradovima Vijeća Europe.

Glavni cilj projekta je integracija, jednake mogućnosti, učešće i međukulturalni dijalog kroz sportske aktivnosti, a neki od podciljeva su:

- uključenje, integracija i podsticanje migranata, izbjeglica, azilanata, "novih građana" i podsticanje društvene uloge starijih i žena kroz sport;
- promoviranje jednakih mogućnosti za pristup sportskim aktivnostima;
- promoviranje interkulturalnog dijaloga i razmjene kroz sportske aktivnosti;
- podizanje svijesti javnosti o stereotipima i svim oblicima diskriminacije;
- jačanje konstruktivnog dijaloga među lokalnim akterima, promoviranje sporta kao značajnog faktora za socijalnu inkluziju;
- jačanje učešća lokalnih sportskih klubova i sportskih saveza u promociji raznolikosti i borbi protiv diskriminacije kroz sport.

Ukupan budžet za sufinansiranje projekta procjenjuje se na 15.000 EUR, a krajnji rok za podnošenje je 24.01.2018. godine.

Gradska služba za lokalnu samoupravu i razvoj grada, prosljedila je informaciju o ovom javnom pozivu Specijalnoj olimpijadi u Bosni i Hercegovini i Udruženju za podršku osobama s intelektualnim teškoćama na području Kantona Sarajevo "Oaza", obzirom da se tema javnog poziva direktno tiče oblasti kojom se bave.

Pri tome, Gradska služba za lokalnu samoupravu i razvoj grada preporučila je da se razmotri mogućnost apliciranja s projektom za održavanje Sportskih igara Oaze u 2018. godini ili s nekom drugom projektnom idejom.